



退溪集
一

^ 16
2327
3



和
號 2327
卷 30-3

退溪先生文集卷之一



詩

過吉先生閭 癸巳

朝行過洛水洛水何漫漫午憩望鰲山鰲山鬱
盤盤清流徹厚坤峭壁陵高寒有村名鳳溪乃
在山水間先生晦其中表閭 朝命領大義不
可撓豈曰辭塵寰千載釣臺風再使激東韓扶
持已無及植立永堅完丈夫貴大節平生知者
難嗟爾世上人慎勿愛高官

月影臺

老樹奇巖碧海堞孤雲遊跡認成烟
高臺月留得精神向我傳
今唯有

矗石樓

落魄江湖知幾日行吟時復上高樓
橫空飛雨一時變八眼長江萬古流
往事蒼茫巢鶴老羈懷搖蕩野雲浮
繁華不屬詩人料一笑無言俯碧洲

與驪州牧李公純訓導李舍遊神勒寺

乙未

京洛風塵一夢悠從公聊作靜中遊
江山曉作

雙眸畫樓閣晴生六月秋問數可能探
理窟談仙直欲謝時流歸來穩放輕舟下
自喜猶能近白鷗公嘗註皇極內篇積功二十餘年而始就
是日論內篇及參同契修鍊之法

臨風樓七夕

勝事由來天所慳臨風樓上且偷閒
樹遮午熱風生檻雲破秋陰日映山
老鶴飲多如酒渴寒蟬吟苦欲詩斑
萬竿脩竹臨池岸塵土城中自不關

嶺南樓

退溪先生文集卷一
樓觀危臨嶺海天客來佳節菊花前雲收湘岸
青楓外水落衡陽白鴈邊錦帳圍將廣寒月玉
簫吹入太清烟平生儘有騷人興猶向尊前踏
綺筵

感春 丙甲

清晨無一事披衣坐西軒家僮掃庭戶寂寥還
掩門細草生幽砌佳樹散芳園杏花雨前稀桃
花夜來繁紅櫻香雪飄綺李銀海翻好鳥如自
矜間關哢朝暄時光忽不畱幽懷悵難言三年
京洛春局促駒在轅悠悠竟何益日夕愧 國

恩我家清洛上熙熙樂閒村隣里事東作雞犬
護籬垣圖書靜几席烟霞映川原溪中魚與鳥
松下鶴與猿樂哉山中人言歸謀酒尊

安東愛蓮堂 并序

堂舊爲亭在蓮池中叔父松齋府君
莅官日嘗有詩曰琴韻泠泠雜雨聲
敗荷無藕尚含清移葵間竹西墻下
紅綠分明各自旌後聳巖李先先生繼
爲府改構爲堂仍掛松齋詩于壁竹
移于北墻而葵無處矣

竹因風細笑無聲荷爲秋涼韻更清不見西墻
紅間綠空餘珠玉映簾旌

雨留新蕃縣

已見中秋月欲虧南州行客尚逶遲
闕三千里白髮高堂十二時醉別故人風挽袖
愁吟孤館雨催詩徒令倦僕知飢渴屈指歸程
併日期

歲季得鄉書書懷

鄉書十數紙字字親舊筆晨興忽滿眼讀盡更
一一豈不喜平安喜多情轉鬱憶我辭北堂霜

風菊花節西來何所爲悶默繫袍笏但知趁公
務不暇憂病骨馳光忽不淹逼此歲除日客枕
多憂思寃夢輒飛越撫躬良自愧報國亦云
缺胡不早收愚歸安在蓬蓽力耕給公上甘旨
奉怡悅茲誠分所宜久矣不自決強顏名利藪
掩抑徒自失猶能得酒狂無計學真訣敝衣屢
欲典瓶粟行告竭宦情易成歇鄉心不可遏感
此遠餉意珍重不在物兒童豈知此呼叫索梨
栗床前有筆硯長吟聊自述

義州雜題十二絕 辛丑

鴨綠天塹

日暮邊城獨倚闌一聲羌笛戍樓間憑君欲識
中原界笑指長江西岸山

州城地利

雉堞峩峩地勢雄分疆遼左壓山戎國門鎖鑰
如天設長得平安報夕烽

山川形勝

龍淵雲氣曉淒淒鷗宙摩空白日低坐待山城
門欲閉角聲吹度大江西

義順館

華館凌雲鴨水濱吾東盡禮為王人來迎鳳詔
歡聲溢去送龍章別恨新

威化島

麗季狂謀敢逆天飛龍景會尚田淵自從神
勸回旌後東海春融萬萬年

三島禁耕

江分沃土勢漫漫上國邊民雜此間已被皇
恩疆界別可無平日戒圖難

聚勝亭

城中那得盡風流水遠山長各自由試問東亭

收勝處一尊堪勸故人留

統軍亭

統軍亭上望江流天際微茫入海洲正使變成
春酒綠古今難盡別離愁

禁銀

一自南人蟻壞防中朝嗤我等行商何能痛
洗吾君耶議法前時動廟堂

斷渡近朝議欲寬銀法

懷璧貪夫欲剖身謾將舟楫斷通津微姦百計
欺疏網國是猶寬鼠輩人

清心堂

虛檻疎櫺愛此堂病夫安臥洗塵忙那堪主帥
挑人醉不分紅粧笑客涼

閱馬

揀閱龍孫入帝閑江頭齊出錦雲斑玉書寫就
傳朝使邊月多情照我還

聚勝亭韻奉別洪公春卿以三聖節使

赴京

徙倚西山欲拚曛平看鴉背閃餘紛虛簷夜納
胡笳月碧瓦晴連海戍雲漸近別懷如水遠無

邊詩興與公分但今日日參高座清暑冰漿不
要勳

平壤練光亭陪監司尚公震夜燕

縹緲城頭翼瓦齊登臨唯覺遠山低殘雲返照
迎初席玉笛瑤琴送早雞檻外長江橫似練空
中明月近堪梯唐公此意真先得恰把亭名二
字題亭名唐公臯所命且書額

早秋夜坐

就屋近西城空庭翳樹木羣蟬得佳陰日夕如
相促須臾入黃昏窻戶失炎溽新月出海來皎

皎臨墻曲蟲鳴在四壁草露翻似沐感時忽興
嘆徂年水流速舊學苦已晚新知良可惡沈疴
喜負心謬筭難諧俗小人思獻愚君子貴知足
悠悠不成寐耿耿照書燭

書堂次金應霖秋懷

秋入梧桐撼一年翻思宿債負山川病中猶憶
聖呼酒貧裏寧甘兄事錢紫氣仙人函谷外黃
冠道士鑑湖邊平生謬廁金閨彥不及渠家養
寸田

讀東國史用應霖韻

蠻觸乾坤計未良，孰為猛獸孰羣羊？爭疆爛沸
雖從漢，開國神明實自唐。但有名存離復合，不
隨形滅臭兼香。秋風白日書窓下，獨對遺編永
憤傷。

夕霽舟上示應霖景說

不堪盡日羣書擁，難負高秋積雨晴。暮色漸迎
山色暝，霞光時倒水光明。愁連海上孤查遠，興
遶江東一鴈橫。暫出瀛洲弄烟艇，何如耕釣赴
初盟。

南樓壁上有六言四韻次韻示二君

古意時時撫琴幽，愁日日關心澗底風。生欲暮
天邊霞散，輕陰須知糟粕非粗。及到淵源又深
與子方欣麗澤，都忘衰病侵尋。

九月七日午憇臨津亭

災傷

御史

臨津渡上秋空碧，斜日清江映石壁。潮來潮去
幾今古，大海西連數峯隔。盤遊狡童厭法宮，輕
薄詞臣昧釁積。轟天簫鼓愁魚龍，軼霧優倡鬧
鈿鳥。豈知眼中強跋扈，遊魂已似浮烟釋。皺巖
明鏡足垂後，驪山禍胎謬傳昔。楓林霜葉爛猩
紅，沙岸蘆花衰雪白。舟人只知爭渡急，鷗鷺無

情事高格鵠山隱翳暮雲頭憑闌客子偏傷激

玉堂春雪用歐公韻 壬寅○二月十四

日內直賦示閔叔道

令節春將半今朝雪候臻氣爭方晚合雲積忽
窮垠入眼瓊花亂翻空玉海新聽窻憐眉窳看
地愛輕勻鼇禁稀鳴索天街絕響輪苦篋撐一
節高柏抗千鈞為瑞將騰賀迎豐且解顰霏微
看到暮浩蕩想連晨病憶重裘襲恩慙 內醞
陳瑤城渾合沓銀屋鬱盤困地自同仙府詩難
語俗人沈吟倚闌處疑是入長春

泰安曉行憶景明兄 時兄賑恤 敬差

在嶺南混以救荒摘奸 御史往湖西

郡城吹角夜開門祗為 王途急駟奔殘夢續
鞍身兀兀游光連海月痕痕驚人別鶴投孤嶼
趁雨耕夫出遠村湖嶺相望隔千里不知何處
戒征轅

宿清風寒碧樓

半生堪愧北山靈一枕邯鄲久未醒薄暮客程
催駟騎清宵仙館對雲屏重遊勝地如乘鶴欲
和佳篇類點螢杜宇聲聲何所訴梨花如雪暗

空庭

鎮川東軒

菲才直道詎追前懦性從來合佩弦民病欲蘇
時雨後春光都盡客愁邊當軒翠樹圍青幄照
眼紅花冪紫烟荒政儘由賢守宰莫令并棄艾
三年

蓮亭小集

清池虛檻逗微涼高樹風生送夕陽紅燭不須
催騷裏待看新月滿華堂

吾鄉李參判先生假歸將因以乞身鄉

人在朝者會饒於先生仲子寓舍奉呈
近體一首時金子裕氏及家兄為承旨
先生仲子架虛為參奉公幹為京畿都
事滉忝舍人南伯仁為成均學正又安
大寶為刑郎以豐基鄉人同參

引退非緣忘主恩高年自合愛丘園一鄉會
饒簪纓簇二品辭歸齒德尊天為宵歡收積雨
月因離恨照芳樽憑風寄與詩僧道林下如今
可共論

秋日南樓晚霽

蕭蕭晚雨霽泱泱小溪響湖雲薄未歸天日淡
猶朗小樓地勢高孤坐几席爽騷情喜曠蕩病
眼怯奔蒼落葉滿林蹊涼風撼書幌萬物各歸
根龍蛇思蟄養邃古民大朴末路世密網幽鳥
亦何意下啄還飛上

湖上園亭偶出效康節體

何限名園漢水頭閒來無處不堪遊白魚切玉
家家興黃菊排金院院秋酌酒喜臨高榭豁題
詩愛向曲闌幽更知易厭紅裙醉要學沙鷗浩
蕩游

與諸君同登狎鷗亭後岡

斷阜瀕江勢欲騫與君登眺暢形寬浮雲遶堞
齊神嶽落日低空近海門萬世經營槐穴夢一
時感慨菊花罇沙禽豈管人間事浩蕩風流無
語言

原州憑虛樓有懷州教金質夫次樓韻

畱贈災傷 御史

此地乖逢又此行紛紛離合況平生頭因別久
欲添雪愁爲秋深更築城鳥過豪英多偉蹟龍
蟠形勢稱雄名思君坐數同襟樂祗在山中耦

世一本作
事

舌耕

酒泉縣酒泉石姜晉山韻

神槽雷劈已上天至今以酒名其泉人言土俗
信荒恠繼之好事非真傳我疑造物本難測厥
初安知有由然當時仙釀非世法糟牀日注靈
波壘幔亭虹橋降真侶瀛尊嶽豆無論錢瓊漿
如流樂且湛官府久廢玉皇前上界有謫一念
差赫然下命六丁遷區區反爲龍所貪一片誤
落金沙淵復畱一片豈無意天戒衆飲官途邊
世人不曉靈真跡渴喉但覺流饒涎謂神之怒

坐一吏謾說相誇今幾年徵奇詰異竟誰是我
欲就問騎鯨仙

錦江亭

鷓啼山裂豈窮年蜀水名同非偶然明滅曉簷
迎海旭飄蕭晚瓦掃秋烟碧潭楓動魚游錦青
壁雲生鶴踏氈更約道人攜鐵笛爲來吹破老
龍眠

洪川三馬峴用景明兄竹嶺途中韻

昔從家兄自京還鄉到竹嶺時秋景
爛熳兄於馬上占一絕云楓林翠壁

彩屏開中有清溪抱石臺誤近忙途
知不幸了無遊跡到蒼苔余今每遇
丹楓碧澗輒誦此詩聊和以遣懷况
今在銀臺

澗水楓林相映開彩屏麗句憶銀臺我今正作
忙途客佳處何緣步石苔

過清平山有感并序

春川之清平山卽古之慶雲山也前
朝李資玄棄官歸隱于此山有普
賢院資玄就而居之號曰文殊寺慶

雲之改號清平亦由資玄而得之也
資玄生長閩風流文雅冠絕當時
亦嘗筮仕而登顯要矣其於求富貴
取青紫不啻如拾地芥然乃能辭榮
避位高蹈遠引蟬蛻於濁穢之中鴻
冥於萬物之表住此山蓋至於三十
七年之久雖卑辭厚禮不足以屈其
節千駟萬鍾不足以動其心非有所
樂於會中者安能如是哉余讀東國
通鑑嘗恠史臣論資玄之辭深加貶

剝至指為貪鄙吝嗇噫何其甚也自古高人逸士如資玄比者豈少哉然類多出於畎畝之中草澤之遠其與木石居鹿豕遊而飯糗茹草乃其素所積習而其心安焉其於長往而不返回亦無難矣至若脫屣於聲利之場抽身於紈綺之叢不怨不悔終始不變如資玄者蓋絕無而僅有之斯不亦可尚哉或謂資玄之去其跡涉於為名以是為可貶則吾又不知其

說也夫枕流漱石枯死巖穴之名孰與於紆青拖紫銘彝鼎被絃歌之名哉自世俗之見言之斯二者均謂之名而苦樂則懸絕資玄於彼則望望然去之若將浼焉於此則昧昧然就之以是終其身而不顧若是而稱曰為名而然此豈近於人情之論歟貪鄙吝嗇其亦尚論之當乎余以是知其胷中必有所自樂者而非世俗之云云者余所以惓惓於資玄者也史

稱資玄置田業為一方農民所苦夫
隱居者豈皆能上食槁壤下飲黃泉
如蚯蚓然哉不為賣藥與賣卜則耕
田以食其力矣然則資玄之置田食
力亦何足病焉而必以是為詬罵耶
此無乃當時士夫之貪榮嗜利役
役於世途者自見資玄之與已相去
不啻黃鵠之與壤蟲於其心蓋亦有
所不平焉竊竊然伺其所為而摘之
以為隱者之無求於世也亦以置田

業為事乎相與造為不根之謗者未
必無之則所謂為農民所苦者安知
非此輩所誣耶昔种明逸之晚節亦
有置田產之謗然而尚論之士不過曰
盛名難副而已曰清議惜之而已安有
如今史氏刻害過甚之論耶前史不闕
而甚傳之後史輕信而驟論之人之好
議論不樂成人之美如是哉余觀資玄
辭就徵表有曰以鳥養鳥庶免鍾鼓之
憂觀魚知魚俾遂江海之樂噫此其為

人之曾次豈世俗饒饒者所能窺其
萬一哉余之奉使而來也過清平山
下問驛吏知山中有曰清平寺者疑
卽古所謂普賢院也限於嚴程不得
叩山門訪幽蹟聊書此以發其嘗讀
史而有感於曾中者如右而繼以詩
云

峽東江盤棧道傾忽逢雲外出溪清至今人說
廬山社是處君爲谷口耕白月滿空餘素抱晴
嵐無跡遣浮榮東韓隱逸誰修傳莫指微疵舜

白珩

奉酬龔巖李先生靈芝精舍詩并序○癸卯
吾鄉靈芝山有佛舍滉舊嘗往來讀
書而山後亦有小築宦游思歸而未
得因自號靈芝山人先生旣歸愛是
庵就而重新之名曰精舍時杖屨適
遙其中詩寄滉且曰足下舊卜山麓
自稱山人而今我先之無乃呼賓作
主耶早晚當訟而辨之云滉感先生
之高義叨承詩札以爲笑謔不勝欣

幸之至謹次詩呈上惶恐再拜

山北蝸廬是假容久纏纏鎖病仍攻願將美號
輸真隱不獨山南第一峯

精廬高架白雲巔藥竈逍遙葛稚川莫把高臺
名杜妄聞風俗駕自回鞭有小臺名杜妄

題林士遂關西行錄後二首

捍闔奇謀漢子秀當年曾受石公方未翻巢窟
龍庭界先作干城鯨海疆絕域病攻天拂亂荒
城雷鬪鬼驚忙豪吟百首凌雲氣妙句何妨鐵
石腸

狂胡射月遼東塞壯士搜兵樂浪墟指顧威靈
驅虎豹風流談笑發詩書海航病得龍王藥江
閣吟窺帝子居唾手功名歸燕領太平容我老
樵漁時二國家將以朝命出兵助討胡士遂
以元帥從事官點兵關西入薪島驅馬得病幾
死乃甦還抵黃州遇大雷雨有詩極道其壯觀

當軒綠叢花四季

門前老槐樹日暮飢鴛蹲赤葉間翠林涼風動
西園返照斂城頭悲蟲號草根深巷斷人來寥
寥獨閉門當軒綠叢花色映丹霞痕寂寞向晚

意淒涼結芳魂畸人厲孤操靜女守舊恩脉脉
如有懷迢迢竟不言在在迫霜露幽貞信乾坤
感此堂上客歲晏思彌敦

舟上示宋台叟

沂泗同上木蘭船往事茫茫知幾年暮雀競棲
雲渚樹殘霞倒影玉湖天仲由自可輕千乘程
尉何曾直一錢笑罷歸來風浪帖蛟龍應亦聾
雄篇

九日獨登書堂後翠微寄林士遂四首

野菊猶多思尊前小摘枝杯盤真偶設歌管豈

曾隨望遠愁腸斷登高病脚危陶然成一醉短
舞為誰垂

聖主開東觀將期瑞世文愧添樗櫟散欣覩鳳
螭紛樂事清時得幽香小坐聞故鄉千岫外醉
眼送歸雲

思君那得暫時寬醉把黃花誰共歡新月媚人
還入手長風欺客且吹冠千重眉黛依依列一
道冰紈湛湛寒景物隨緣易陳跡急須摹取與
君看

今古茫茫似逝川登臨佳景故依然同牀不識

寧非貴舉世相疵亦有傳語寧豈容罇俎裏愁
城難著菊花前歸鴉落日都成畫臥看東湖玉
鏡天

送金厚之修撰乞假歸觀仍請外補養

親恩許之行

君不見鯢魚化作垂天翼九萬搏風竟奚適下
有區區斤鷄輩搶榆控地皆真樂又不見魏瓠
種成實五石不願爲瓢憂濶落何況作尊浮江
湖卻笑莊生未甚達我昔與子遊泮宮一言道
合欣相得君知處世如虛舟我信散材同樗櫟

富貴於我等浮雲偶然得之非吾求風雲感激
偶一時玉堂金馬接跡追時流恩榮合沓謬所
當歲月紛紛閱江浪道山同讀未見書我齒已
衰君方壯抽玄關發奧藏經世謀猷兮貴國文
章旨 賜官醞塵飛鞚珍分 御厨廩繼倉昔
人已云不敢當矧余焉能不愧顏秋風蕭蕭吹
漢水我夢夜夜白石青雲間青雲白石我尚阻
海山千里君先去君言欲作反哺烏乞得專城
有蟹無監處人生至樂君有之具慶堂前舞綵
衣此外萬事何足道儻來軒冕如塵微不羨圖

凌雲不須擁旌麾子真巖耕名已振原憲蓬居
道非吝須知王式本不來莫恠邴曼終難進送
君歸搔我首爲君歌薄薄酒相思莫惜寄玉音
我詩聊贈千金帚

次韻答金應霖林士遂在東湖見寄二

首甲辰○余癸卯冬下鄉病未還 朝

春兩君寄詩來

雪盡花開病臥村消磨未盡只詩魂榮枯輾轉
回雙轂倚伏冥茫隔九閻芝朮養生顏益古烟
霞八骨語無煩山中氣味君知否世事都無一

句論

金君韶奏鳳來儀林子兼將百步威故國春風
畱病容神交書札到柴扉半成山屋謀會拙全
落湖梅事太違知我不材君最甚可無容得會
稽歸時應霖爲銓郎故屬以外補

湖堂梅花暮春始開用東坡韻二首春

赴 召後

我昔南遊訪梅村風烟日日銷吟魂天涯獨對
歎國艷驛路折寄悲塵昏邇來京輦苦相憶清
夢夜夜飛丘園那知此境是西湖邂逅相看一

笑溫芳心寂寞殿殘春玉貌綽約迎初暎伴鶴
高人不出山辭輦貞姬常掩門天教晚發壓桃
杏妙處不盡騷人言媚嫵何妨鐵石腸莫辭病
裏攜甕罇

藐姑山人臘雪材鍊形化作寒梅魂風吹雪洗
見本真玉色天然超世昏高情不入衆芳騷千
載一笑孤山園世人不識嘆類沈今我獨得欣
逢溫神清骨凜物自悟至道不假餐霞暎昨夜
夢見縞衣仙同跨白鳳飛天門蟾宮要授玉杵
藥織女前導姮娥言覺來異香滿懷袖月下攀

條傾一罇

湖堂曉起用東坡定惠院月夜偶出韻

雞鳴水村月掛簷一枕歸夢驚殘夜窸籠聞寂
蓬觀裏曙色葱瓏花樹下庭梅半落香更吹石
澗新疏響轉瀉欲知仙境定何如聞說瑤臺此
其亞綺饌常繼太官供蘭燭時容漁店借病來
酒伴已全疎老去詩情渾未謝青春欲暮鳳城
塵白雲空憶芝山舍年多老松棲怨鶴雨荒幽
圃拋寒蔗榮辱如雲本來無富貴逼人真堪怕
朝來百轉林下鳥似與詩僧助朝罵

七月望日狎鷗亭即事四首時書堂有
故稟 啓移寓於此

奔雲陣陣度簷楹雨過長江一半明
隱几笑看爭渡客漢江樓下雪山傾

歸舟擘擘上前灘忽掛風帆萬里閒
總把向來牽挽力一時酣寢浪花間

江中風起雨冥冥葉上青蛙止復鳴
兩雨漁舟依別岸晚來收釣入柴荆

望中奇變忽無蹤日照西雲淡夕容
未露四圍青黛色唯看千頃白銀鎔

晚步 明陽正賢孫嘗有此詩偶讀而愛
之用其韻

苦忘亂抽書散漫還復整曜靈忽西頽
江光搖林影扶筇下中庭矯首望雲嶺
漠漠炊烟生蕭蕭原野冷田家近秋獲
喜色動曰井鴉還天機熟鷺立風標迴
我生獨何爲宿願久相梗無人語此懷
瑶琴彈夜靜

登狎鷗亭後岡憶應霖士遂吉元四首
遠近峯巒插彼蒼水光橫帶暮天長
無人共說年前事日日孤吟上翠岡
去年與三君共登此

去年燈火伴書牀欲讀思君卻置傍
彌勒形模江海量城中咫尺阻音光

右應霖時持服在城中

萬里星奔蜀道難柳生中道不能鞍
裁書欲寄關河阻安得如雲生羽翰

右士遂使關北中途病臥

趨庭西海路漫漫約在中秋月正團
為洗東湖雙玉盞看君豪向瀉敬馮湍

右吉元時觀親海州

夜起有感

缺月懸空窓夜明壁間絡緯響機鳴
淒淒切切如相促不惟懶婦壯士驚
隣雞不歌更漏遲櫪馬齟草風雨聲
攬衣呼童睡不應牀頭暗燼垂短檠
挑燈照我簡編讀口角瀾翻銀河傾
古人去我不待我芻豢稅口同性情
安得平生金石友重玄玉匙關鍵扁
十年國恩重於山一生多病終無成
去年霜髮映黑絲今年瘦骨仍嶮嶮
拓窓看月月未斜白練一道澄江平

大雷雨行以上並在狎鷗亭作

江亭曉起推月戶遠近蒼茫靜林塢
忽然江海

色悽慘礮車雲起初如縷望中紫電掣金蛇恠
氣颯香相吞吐西來黑風撼山岳龍捲湖波半
空舞太陰崩騰鬼神惡銀河屈注傾天府鯨鯢
駕浪馳前陣虎豹爭鋒嚴後鼓穿城半夜縱千
牛斫樹黃昏飛萬弩阿香鼉鼉踏狂車劃破乾
坤壯神斧頗疑勢觸天柱折鍊石區區憂莫補
又恐龍門未疏鑿洪流湯湯漂下土農夫投鐺
失畎澮賈客飄帆迷激浦堂上書生亦何為斂
衽低徊上天怒杜牧豪吟憶壯觀夏侯談經猶
倚柱斯須一眼盡如掃萬里晴光曬秋宇太虛

幽幽本無物孰居無事爲之主一闔一闢恣披
拂變化神功誰敢侮天公號令不虛出摧殘震
動皆仁煦向來所見付幻境一笑臨風大江滸

剪開檻外樹作

南樓意不極檻前樹翦翦那聞竽籟響祇見蟻
蟻孔勃然難恕宥腰斧奚奴勇丁丁落遠揚豁
豁去蔽壅川原忽紛披宴坐不移踵遠山入簾
鉤愁髻樊姬攤平湖熨冰紈几席天光動恍如
學變化臺殿雲間聳向來墻面界萬象爭獻捧
飛鴻渺天末世事等蠛蠓人心辟邪蠱國政去

微廼較我開林功無分輕與重

奉贈圭庵宋眉叟以冬至副使赴京

廣平先生鐵作腸湖南今歲留甘棠歸來受
命賀天朝星槎迢迢上銀潢海東精英大雅資
不怨賢勞馳四方湖陰筆力扛九鼎中華感動傳
文章參卿使事豈天意夜占奎壁騰光芒入海
手探驪龍珠登天耳聞鈞音張豈但壯遊增氣
義樂哉酬唱如宮商風雲隨處落咳唾誰復按
劍投夜光我似醯雞守塵甕大方之家嗟望洋
蓬山日月轉秋序坐覺別恨添鬢霜高風逸軌

不可攀西望萬里關河長謬蒙索贈一篇詩幾
日重躋君子堂

送林士遂以迎詔使從事赴義州三

首乙巳

詩老西迎詔使行一時從事盡豪英漳濱獨
荷天恩重日夕空多感慨情混亦忝是行
恩許病免

伉伉騷壇兩老臣繞朝贈策可無人料知擒縱
如神處一笑先衝萬馬塵

不數林間喚雨鳩海東雙鳥起千秋爭看月斧

揮神匠血指應難據一頭

望湖堂尋梅 丙午仲春將歸嶺南

望湖堂下一株梅幾度尋春走馬來千里歸程
難汝負敲門更作玉山頽

再用前韻答景說

聞道湖邊已放梅銀鞍豪客不曾來獨憐憔悴
南行子一醉同君抵日頽

堯觀院溪上奉懷家兄話別於東郊二

首

怊悵迷塗始可追踏青中路尚逶迤祇應此去

相思夢長在東郊細雨時

細雨東郊酒一罇悲歎萬事不堪論何時石室
雲巖裏共對清宵月滿軒兄家在木覓山麓扁
小齋曰雲巖石室

寓月瀾僧舍書懷二首

十五年前此讀書紅塵奔走竟何如只今病骨
迷丹訣依舊灘聲上碧虛居士忘家為老伴胡
僧結約初幽廬不堪每累 君恩重非為高名
向釣漁

紫陌休騎沙苑馬青山來伴月瀾僧靜中自得

歎疑歎之誤
凡言疑恐之
類即門下諸
公所校

安心法不用人間更折肱時以司僕正來故使
沙苑馬

以事當還都至榮川病發輟行畱草谷

田舍

少日苦紳服訂頑至今憎學但慙顏狂奔幸脫
千重險靜退纔嘗一味閒羈鳥有時依樹木野
僧隨處著雲山後園花萼猶爭笑何必區區病
始還

孟夏廿五日入龍壽寺馬上寄黃敬甫
作意入山尋舊遊青雲白石聊散愁天公爲我

捲宿霧亂山滴翠當馬頭節近端陽棟花風家
家喜氣迎麥秋何須苦讀五車書此去賣劍當
買牛

晨至溪莊偶記東坡新城途中詩用其

韻二首

觸熱朝天病未行溪莊回轡趁雞聲雲山正似
盟藏券身世渾如戰退鉦雨過洞門林氣爽風
生石竇澗音清山翁笑問溪翁事只要躬耕代
舌耕

朝從溪上傍溪行纔到溪莊聞雨聲里社行誇

宰分肉詞壇曾笑將鳴鉦寬閒南野麥浪徧翠
密西林禽語清 聖主洪恩知不棄只緣多病
合歸耕

聾巖先生愛日堂用李復古先生韻

奇巖已得專佳境至道應難喻俗人 广屋靜深
堪讀易崖臺寥朗可延真窻前綠水寒開鏡石
上蒼松老感鱗幸我溪莊客地近陪遊三徑往
來頻

士遂寄詩次韻

故人在南滇尺素傳鯉魚緘封明月珠贈我無

所需慰我如病鶴一言意太足我今百無用纏
此杯蛇惑 聖恩極天涵臣質垂蒲彫為農宣
城野呻吟晝連宵安得忽變化培風負大翼見
君十洲中羣仙導儀飾閭苑摘蟠桃扶桑看出
日至道揖松喬餘事追甫白

東巖言志

新卜東偏巨麓頭縱橫巖石總成幽烟雲香靄
山間老溪澗彎環野際流萬卷生涯欣有托一
犁心事歎猶求丁寧莫向詩僧道不是真休是
病休

獨遊孤山至月明潭因並水循山而下晚
抵退溪每得勝境卽賦一絕凡九首

孤山

何年神斧破堅頑壁立千尋跨玉灣不有幽人
來作主孤山孤絕更誰攀

日洞洞在月明潭上其稱正與相對
俗誤呼那乙邑云是古邑居之所非也
故改之有琴孫兩生田其中

日洞佳名配月潭官居知是謬村談箇中儘有
良田地欲問琴孫置一庵

月明潭有禱雨壇

窈然潭洞秀而清陰壘中藏木石靈十日
今可霽抱珠歸臥月冥冥

寒栗潭

瘦馬凌兢越翠岑俯窺幽壑氣蕭森清遊步步
皆仙賞蛭石長松滿碧潯

景巖

激水千年詎有窮中流屹屹勢爭雄人生蹤跡
如鴻梗立腳誰能似此中

彌川長潭

長憶童時釣此間
卅年風月負塵寰
我來識得溪山面
未必溪山識老顏

白雲洞舊呼船亭知乃鄉音之誤也

青山綠水已超氛
更著中間白白雲
為洗鄉音還本色
地靈應許我知君

丹砂壁

下有龍淵上虎巖
藏砂千仞玉為函
故應此境人多壽
病我何須斲翠巉

川沙村

幽篁川沙李文居
平田禾熟好林墟
卜隣我亦

專西壑茅屋中藏萬卷書

後又得二勝

葛仙臺丹砂壁南有王母城山山之西
向而北花處有兩臺名其一曰葛仙其
一曰高世云

丹砂南壁葛仙臺
百匝雲山一水迴
若使仙翁今可見
願供薪水乞靈來

高世臺高世紫芝歌中語魏鶴山詩子

雲亦號知書者掄把商山作采榮

碧嶂丹崖削玉成
溪流曲曲抱山清
臺名莫向

癡人說怕認商山作采榮

踏青登霞山丁未

踏青幽徑草茸茸
來上霞山坐碧峯
萬樹欲花春漠漠
一山將暮翠重重
舊遊京國渾如夢
新卜田園只自農
曲水佳辰當過密
題詩回首涕霑曾

清吟石并序

溫溪下流有盤石臨溪辛未年中叔
父松齋府君以江原監司來覲出游
石上澗以童子侍側有紅衣官人來

謁乃昌樂丞也叔父有詩曰欲得溪

山妙松門獨自回清吟還敗意誰遣

督郵來今與諸兄姪會此追念前事

感歎久之因名其石曰清吟石用其

韻二絕云

總角陪游地吟竟去不回
唯餘溪響石似欲慰
重來

坡陀巨石在窈窕一溪回
更待山花發吾今較
早來

題黃仲舉方丈山遊錄

方丈仙山非世間秦皇徒慕漢空憐不緣變化
因丹藥那得飛昇出紫烟感慨躊躇青鶴洞道
遙游戲大鵬天半生未試囊中法猶幸神遊託
巨編

和西林院詩韻二首 三月寓月瀾庵

似與春山宿契深今年芒屨又登臨空懷古寺
重來感詎識林中萬古心
從師學道寓禪林壁上題詩感慨深寂寞海東
千載後自憐山月映孤衾

雨晴述懷

孟夏恢台一氣亨山林百物爭流形龍公及時
霈嘉澤上天作意蘇疲氓丁壯驅牛出四野婦
姑執筐遵微行嚶嚶禽鳥自相和矻矻人生各
有營我獨來居古僧舍家操耒耜非躬耕不願
少林從達摩不願崆峒師廣成天開一片燭幽
鑑篁墩旨訣西山經一川風月要人看萬古青
山依舊青伐檀之歌畏力織莫道傍人聞絕纓
戲作七臺三曲詩月瀾庵近山臨水而斷
如臺形者凡七水繞山成曲者凡三

招隱臺

晨興越清溪杖策尋雲壑幽人在何許鬱鬱松
桂碧山中何所樂鳥獸悲躑躅永懷不易見躊
躇長太息

月瀾臺

高山有紀堂勝處皆臨水古庵自寂寞可矣幽
樓子長空雲乍捲碧潭風欲起願從弄月入契
此觀瀾旨

考槃臺

層臺俯絕壑下有泉鳴玉西臨豁而曠東轉奧
且閔剪蔚得佳境茅茨行可卜隱求復何為優

游歌弗告

凝思臺

寒裳度寒磻捫葛陟高崖老松盤巖顛百霆猶
力排刊除舊叢灌面勢幽且佳窅然坐終日無
人知我懷

朗詠臺

躋攀出風磴一眼盡山川不有妙高處焉知雲
水天俯仰宇宙間我洋思古賢借問擲金聲何
如沂上絃

御風臺

至人神變化出入有無間冷然馭神馬旬有五
乃還嗟哉聞百人夏蟲不知寒請君登此臺不
用朝霞餐

凌雲臺

下有清清水上有白白雲斷峯呼作臺登臨萬
象分盪曾生浩氣超然離垢氛豈但劉天子飄
飄賞奇文

石潭曲

奔流下石灘一泓湛寒碧躑躅爛錦崖莓苔斑
釣石白鷗似我閒鯨魚知爾樂何時辦小艇長

歌弄明月

川沙曲

川流轉山來玉虹抱村斜岸上藹綠疇林邊鋪
白沙石梁堪釣遊墟谷可經過西望紫霞塢亦
有幽人家

丹砂曲

青壁欲生雲綠水如入畫人居朱陳村花發桃
源界安知萬斛砂中藏天秘戒嗟我昧真訣悵
望聊興喟

閒讀武夷志次九曲樵歌韻十首

一本開下
有唐字

不是仙山詫異靈滄洲遊跡想餘清故能感激
前宵夢一擢賡歌九曲聲

我從一曲覓漁船天柱依然瞰逝川一自真儒
吟賞後同亭無復管風烟

二曲仙娥化碧峯天妍絕世靚脩容不應更覲
傾城薦閭闔雲深一萬重

三曲懸崖挿巨船空飛須此恠當年濟川畢竟
如何用萬劫空煩鬼護憐

四曲仙機靜夜巖金雞唱曉羽毛毳此間更有
風流在披得羊裘釣月潭先生在武夷答劉靜

春寄羊裘詩狂奴今夜知何處月冷風淒未肯

歸

當年五曲入山深大隱還須隱叢林擬把瑤琴

彈夜月山前荷篲肯知心

六曲回環碧玉灣靈蹤何許但雲關落花流水

來深處始覺仙家日月閒

七曲撐篙又一灘天壺奇勝最堪看何當喚取

流霞酌醉挾飛仙鶴背寒

八曲雲屏護水開飄然一棹任旋洄樓巖可識

天公意鼓得遊人究竟來

九曲山開只曠然人烟墟落俯長川勸君莫道
斯遊極妙處猶須別一天

古意秋赴 召後

温温荆山玉淑氣含精英夜夜虹貫巖山鬼自
道驚抱哭何氏子三獻不避刑斲爲萬乘器雄
誇價連城在此術國寶在彼衛天成君看甓社
珠光彩奪月明出入有無間世巧焉得嬰

玉堂 宣醞後出書堂馬上作 景說應

霖子用景霖在堂見待

出城延望海中山一色山川玉界寒箇裏羣仙

多一念清尊終夕待吾還

次韻景說景霖二首

朽拙身多病繁華意易闌那知 宣札下復入
道山間自愧荒疎學人驚醜瘦顏感君加策勵
獲寶不知還
相見新詩好相思舊恨闌三餘蓬觀裏萬卷碧
窓間病劇無遺力 思深只厚顏誠難效犬馬
非是故言還

雪竹歌

漢陽城中三日雪門巷來人遠隔絕病臥無心

問幾尺唯覺衾裯冷如鐵幽軒綠竹我所愛夜
夜風鳴如戛玉兒童驚報導我出攜杖來看久
嘆息梢梢埋沒太無端枝枝壓重皆欲折最憐
中有一兩竿高拔千尋猶抗節不愁虛心受凍
破無柰老根迸地裂杲杲太陽頭上臨不應彩
鳳終無食

冬日甚雨已而大雪喜而有作

止風怒起萬木號黝雲四合如翻濤山蒸礎潤
氣鬱沈雨聲晝夜聞嘈嘈當冬沆可石燕蟄此
日恠見商羊跳直恐渺漫百川溢已覺橫流千

瀆豪怒陽發洩龍戰野冥頊斂縮如藏逃爾來
寒燠苦不常饑荒疫癘民嗷嗷腐儒無策謾多
憂 聖上焦思精貫高曉來風色忽已變滕六
鼻鼻陰機挑初看霰集如撒鹽頃刻眩眼吹鵝
毛莫嫌潢沔旋消融漸見高低渾蓋韜乾坤浩
蕩無際涯萬境合沓同周遭豐年作瑞古所云
千尺藏蝗那肆饕天民天恤理則然導迎佳祥
宜更勞豈惟端本弭衆災中和樂職堪濡毫流
民流民各歸業從今 聖澤完爾曹

上龔巖李先生

高臺新曲賞深秋
手折黃花對白鷗
仰德至今
清夜夢月明時
復到中洲

病中讀史有感三首

史記子貢傳

一貫微音契聖神
縱橫那肯自輕身
固知遷史
終難信誰爲青天洗點塵

史記張良傳

天授奇謀託異神
秦皇驚倒項分身
可知無欲
能超世不似韓彭一網塵

晉史潘岳傳

自是錢兄絕有神
清談須與更謀身
潘郎可惜
多才思白壁中藏一斛塵

樂山南景霖在書堂雪中寄松酒兼律

詩次韻卻寄

詞合風雪字騰龍
知是騷翁詫釀松
白墮不傳
千日法烏程安得十分濃
間開陶隱聽風院
笑灌雷侯辟穀曾
直欲騎雲從此去
道山銀闕儻相容

赴丹山書堂於仲初左通禮
閔景說正
南景霖正尹士推典翰
餞席留贈戊申

十載沈痾愧素餐 洪恩猶得郡符懸
青松白鶴雖無分 碧水丹山信有緣
北闕戀懷分燭夜 東湖離思賞梅天
撫摩凋瘵疲心力 鈴閣翻應憶故田
有一斯文老為青松府使自號青松
白鶴余嘗求青松不得而得丹山

洛生驛樓次金應霖贈別韻二首

郵亭孤坐聽禽啼 物色迎春動澗溪
他日偶同雲出壑 此身那學婦藏閨
最憐新得丹砂訣 長憶曾聯玉府樓
絕境歸時堪詫異 驪珠雙贈袖中攜

困倚闌干睡一場 依然夢到五雲鄉
寒花初發去 栗里芳草欲生辭
洛陽多病不堪承 誤寵一言未可許
真剛天教至拙藏 深僻知我眉間彩色黃

次鄭吉元韻

遊騎城南已踏春 路邊楊柳綠絲新
風流藉甚來相別 知是能詩谷口人

馬上次閔景說韻

浩浩春泥一望間 行人愁去復愁還
但能乘鶴遊丹峽 何羨騎牛度紫關
離合正如塵起陌古

今猶似澤藏山心懸 魏闕誠無柰老病由來
合置間

二月一日郡齋雨中得洪退之見寄次
韻

到郡念民事經旬不讀書花朝坐衙後燕寢得
詩餘意愜香凝帳神清雨滿虛珍投無可答佩
服擬璜璫

買浦倉賑給暮歸馬上

一麾出守愧疎慵民困當春意自忡去傍紫崖
殘雪外歸吟斜景亂山中陽嗔草茁人還羨天

放鷗閒我未同十室不堪星在罾絃歌那得變
謠風

島潭二絕

何年神物動雲雷絕境中間巨石開萬古不隨
波浪去巍然如待使君來
一棹扁舟放碧瀾橫穿三島鏡光寒泝洄欲盡
西崖勝須傍東邊白玉灣

仙巖俗號佛巖今改

白石層層疊素甃神工不待巧磨鑄從教吼落
雲門水臺下寒開一鑑天

馬上

朝行俯聽清溪響暮歸遠望青山影朝行暮歸
山水中山如蒼屏水明鏡在山願為棲雲鶴在
水願為游波鷗不知符竹誤我事強顏自謂遊
丹丘

二樂樓次東坡黃樓詩韻

夜臥郡齋清夢作遊山詩晨登溪樓敞對山吟
古詞赤城山中仙游天弄雲旗貽我黃精草約
我勿差池萬事一敝屣胡為學詭隨已呼祈孔
賓莫訝朱桃推我非戀塵上亦非媚俗姿淹茲

久不決我車何時脂吾聞名教中心法謹毫釐
二樂如得樂此外吾何知

花灘

峽坂雲霧遇一灘雷驚電激雪崩湍斯須脫得
垂堂戒一任仙蓬雨打寒

舟中

入眼平湖雨滿空一杯未盡日穿篷水光山色
渾如畫分付詩人較淡濃

龜潭

衆壑趨西出自東峽明餘怒始橫通幾爭激浪

崩雲上纔入清潭拭鏡中鬼刻千形山露骨仙
游萬仞鶴盤風隱巖南畔苔磯石靈境依然九
曲同

伏聞重新愛日堂上聾巖先生

巖帶江聲自作聾巖居仙伯本真聰曾參可不
悲三釜疏廣元非傲萬鍾月色想添新水搯秋
香行發舊霜叢但令日日陪幽賞何必題名向
此中先生令滉作記滉辭之故云

白雲洞書院示諸生已酉○赴豐邑後

小白南墟古順興竹溪寒瀉白雲層生材衛道

功何遠立廟尊賢事匪曾景仰自多來後碩藏
修非爲慕騫騰古人不見心猶見月照方塘冷
欲冰

答周景遊見寄二首

我是疎愚一病人叨蒙郡寄自前春換符得遂
平生願來向雲溪謁廟真
自闕誰能倡別人難窺斯道曠千春竹溪但欲
投冠去研味遺經得道真

石菴寺效周景遊次紫極宮感秋詩韻并

景遊詩叙云李太白四十九作紫極

感秋詩其後蘇黃皆效之余夜誦三
賢詩多少感慨乃次其韻云云蓋景
遊時年四十九矣混今犬馬之齒亦
不多不少適與相值然則其所感寧
有異於昔之數君子耶敢用元韻遣

懷云

鳳鳥去不返空山無舊竹山中舊多苦竹辛丑
結實後盡枯死寒溪空紀名一源誰挹掬竹溪
源出於此古人不可見吾生亦云獨幽尋遂高
陟感歎梵宮宿四十九年非知之莫再卜世患

累牽掣時光迭往復門有打鐵作羹有捩手覆
寡過胡不勉夫仁亦在熟

紫蓋峯

天嫌吾未趁丹楓故遣山花發晚紅正似虹橋
連綵幕羣仙酣宴武夷中

國望峯三首

漠漠烟雲生晚日龍門不見沉脩門欲知紫
極宸居處天際遙瞻一抹痕
烟雲杳靄幾重重龍首軒昂太白雄白髮未成
歸隱計憑高回望思無窮

南望山河許幾疆雲低祇覺海天長願從鶴駕
招仙子飛上清都謁玉皇

答尚牧金季珍

我今爲郡子爲州豪士空慙百尺樓若待足時
方欲退溪山何日得清遊

郡齋有懷小白之遊追次景遊用昌黎

衡岳詩韻

搏沙攬土愁神工辦此巨嶽東海中衆山培塿
卑幼行直與太白爭爲雄南臨徐伐北滅貊茫
乎利澤施無窮我叨郡紱守茲土自慙無以興

謠風烟霞結習尚未除幽夢夜夜精靈通一朝
振翮出雲外似馭鶴背超虛空國望峯頭望四
海蓬萊杳杳心神融羣仙婢約官府足朝遊崑
崙暮天宮下憫蒼生蟣虱然惟見塵埃千丈紅
丹臺尚掛我名姓舉手相招懷我衷欲往從之
畏下墜久食烟火悲吾躬恭聞泰山天下大亦
有南嶽將無同聖登賢游象道巍名與天地相
爲終斯人斯世我若及何用遠慕飛昇功商山
白髮好事翁續韓正直羞臃腫嗟我非韓亦非
周狂吟擲筆歸牆東

郡齋移竹

君不見子猷平生酷愛竹蕭灑風流真絕俗一日不可無此君坐令百卉來匍匐又不見樂天才調本浮華相國亭中變初服櫻桃楊柳揔莫污晚歲飄然八灘曲我從承明一麾出故山三載辭麋鹿鈴齋不有竹千挺曉夕何以清隈隩舊林憔悴沒寒烟新筍縱橫翳凡木窻前地偏石堪砌軒外人稀壇可築忽然霈澤遍農野我亦攜鏡斲蒼玉遷辰不待醉兀兀去故何曾戀碌碌眼看十十復五五儼立相持如伯叔初來

魯卿慰此心盍歸殷賢枵厥腹可惜中有誤遭挫斫頭將軍應爲蜀杖屨巡簷訝羣兒瓶罐攜泉忙一僕抽枝展葉漸猗猗脫綳行鞭更續續已知涼氣灑琴書行見高標出牆屋風敲雜佩韻琤戛月碎寒金影熠煜千尋強寫笑文同萬夫錯比啖杜牧世人區區鶴又州誰肯同歸節也獨荒哉酒放林下七邀矣詩豪溪上六儻有翩翩丹穴禽千載回翔此棲宿老我年來冷淡生相對寧憂食無肉從今更歎衛公賢一篇淇澳滄心讀何必柴桑歸去來白衣悵望東籬菊

浮石寺聚遠樓鄭湖陰贈僧韻

鬼役天成萬古樓風雲一任洗新秋夜深獨對
高僧榻唯見長空月似鉤

八月十五日夜吟

夢覺圓明積裏珠安排纔涉已非初寒溪遠響
紙窓靜斜月清光竹閣虛四序孰居無事者羣
蟲爭訴不平如為官不理身多病回首平生愧
有餘

十月十日夜大雷雨

十月中宵風亂鳴雷驚電激雨如傾只今天意

何多舛起坐茫然百感生

十一日曉地震三首

風雨雷霆天怒甚如何地道亦靡寧勢崩山岳
聲驅海誰使神龍戰血腥

風起荒城葉亂飛頑雲如墨雨霏霏不知天意
緣何怒陰電交揮更逞威是日雨電

兇雲虐雪極陰獍風勢如奔百萬兵凍及日中
烏可畏溝中未暇念民生是夜大風大寒

池方寺瀑布二首

灑灑仙風襲客衣陰陰山木恠禽飛何人好事

同來看獨對蒼崖信筆揮

坐石沈吟日欲斜碧潭增色湛無波莫辭再訪
清秋後要看楓林爛似紗

退溪草屋喜黃錦溪來訪庚戌○龍郡

歸鄉後

溪上逢君叩所疑濁醪聊復爲君持天公卻恨
梅花晚故遣斯須雪滿枝

移草屋於溪西名曰寒棲庵

茅茨移構澗巖中正值巖花發亂紅古往今來
時已晚朝耕夜讀樂無窮

三月三日雨中寓感用丁未踏青韻

不向江皋踏綠茸小窻看雨對前峰間忙頓別
差爲幸愚智相懸定幾重古學未傳皆末士淳
風猶在祇村農呼兒且進杯中物澆我平生襞
積會

拜龔巖先生先生令侍兒歌東坡月夜
飲杏花下詩次其韻示之澗亦奉和呈
上

病臥山中九十春起拜巖仙春喚人巖中老仙
惜光景獨立汀洲詠白蘋倚巖紅杏尚未發催

令雪兒唱香雪待得花開要賞春只恐花時已
無月咳嗽珠璣俄頃中吟罷不覺杯心空江邊
歸興浩無涯回首亂山花欲紅

李先生來臨寒樓

清溪西畔結茅齋俗客何曾款戶開頓荷山南
老仙伯肩輿穿得萬花來

退溪

身退安愚分學退憂暮境溪上始定居臨流日
有省

寒樓

結茅爲林廬下有寒泉瀉樓遲足可娛不恨無
知者

溪居雜興二首

買地青霞外移居碧澗傍深耽惟水石大賞只
松篁靜裏看時興閒中閱往芳柴門宜迴處心
事一書壯

開荒臨綠岸結屋對丹巖澗草多無號沙禽並
不凡山居思損益溪座聽韶咸爛煮新蔬美何
須待晚饒

寒樓雨後書事

思一本作
知

浪浪夜雨聲朝起青山濕宿雲半解駁澗水流
更急巖林迎光景衆綠如新沐野人相喚出幽
鳥語款曲柴荆澹無事圖書盈四壁古人不在
茲其言有餘馥望望三益友來從三徑讀

和陶集移居韻二首 五月十八日

我生五十年今有半成宅地僻人罕至山深日
易夕亦知生事疎猶勝勞形役省力撤舊材隨
宜展敝席無論固窮節野性諧夙昔苟爲道不
同千言難剖析

獨酌一杯酒閒詠陶韋詩逍遙林澗中曠然心

樂之古書誠有味多病畏沈思疾惡憤遺臭慕
善嗟後時溪聲日夜流山色古今茲何以慰吾
心聖言不我欺

和陶集飲酒二十首

其一

無酒苦無棕有酒斯飲之得閒方得樂爲樂當
及時薰風鼓萬物亨嘉今若茲物與我同樂貧
病復何疑豈不知彼榮虛名難久持

其二

我欲挾天風遨遊崑崙山區區未免俗至今無

足言前有百千世後有億萬年醉中見天真那
憂醒者傳

其三

智者巧投機愚者滯常情滔滔汨末流總爲中
利名古來賢哲人吾獨後於生此道卽裘褐柰
何或猜驚拳拳抱苦心淹留愧無成

其山

白雲在空谷無心天上飛偶然隨風起何更有
戀悲游空恒泛泛含雨亦依依苟不需嘉澤曷
若適其歸我思古賢達末路何多衰旣雨不能

罷能亦與天道違

其五

我本山野質愛靜不愛喧愛喧固不可愛靜亦
一偏君看大道人朝市等雲山義安卽蹈之可
往亦可還但恐易磷緇寧敦靜修言

其六

有人生卓然吾獨異於是少愚晚益驚無成反
有毀自耽衆所棄屏迹亦宜爾區區口體問豈
必魚與綺

其七

憶昨始來茲四山花繁英俄然暗衆綠悄悄幽
居情寧聞有石人百歲苦易傾邈彼古聖賢身
死道長鳴不及望門牆咄咄如吾生

其八

園林朝雨過葱蒨嘉樹姿晚涼生衆虛餘靄棲
高枝沈寥茅屋靜豁豁洞壑奇酒無獨飲理偶
興聊自爲陶然形迹忘況復嬰塵羈

其九

皎日出東北巖居霧露開川原曠延矚爽朗幽
人懷萬物各自得玄化妙無乖飛飛雙燕子長

夏自來棲有口不啄粟卒瘁銜其泥巢成養雛
去物性天所諧無機似獨智用巧還羣迷晴簷
語呢喃主人夢初回

其十

所思在何許天涯與地隅迢迢隔塵響浩浩綿
川塗人生如朝露羲馭不停驅手中綠綺琴絃
絕悲有餘獨有杯中物時時慰索居

其十一

東方有一士夙志慕斯道春糧欲往從守隅今
向老孰能諭迷塗人皆惡衰槁蹙蹙顧四方不

見同所好空知五車書終勝萬金寶至哉天下
樂從來不在表

其十二

問君今何爲麥秋正丁時山泉清可釀自勸寧
有辭每攬昔人懷感慨祇如茲安得金蘭友趣
舍不復疑片言釋千誣一誠消百欺此時忘憂
物吾亦可已之

其十三

我思千載人蘆峰建陽境藏修一庵晦著書萬
古醒往者待折衷來者得挈領懿哉盛授受源

遠雜魯穎口耳障狂瀾心經嘉訓炳

其十四

舜文久徂世朝陽鳳不至祥麟又已遠叔季如
昏醉仰止洛與閔羣賢起鱗次吾生晚且僻獨
昧修良貴朝聞夕死可此言誠有味

其十五

道邇求諸遠滔滔曠安宅哲人有緒言因可追
心迹苟未及唯一何異誇聞百常恠楚狂輩妄
自分黑白遇聖不遜志潔身還可惜

其十六

吾東號鄒魯儒者誦六經豈無知好之何人是
有成矯矯鄭烏川守死終不更佔畢文起衰求
道盈其庭有能青出藍金鄭相繼鳴莫逮門下
役撫躬傷幽情

其十七

蕭蕭草蓋屋上雨而旁風就燥屢移牀收書故
篋中但撫無絃琴寧知窮與通誇言笑宋玉欲
掛扶桑弓

其十八

酒中有妙理未必人人得取樂酣叫中無乃汝

曹感當其乍醺醺浩氣兩間塞釋惱而破茗大
勝榮槐國畢竟是有待臨風還愧默

其十九

小少聞聖訓學優乃登仕偶為名所累輾轉徒
失已龍鍾猶強顏竊獨為深恥高蹈非吾事居
然在鄉里所願善人多是乃天地紀四時調玉
燭萬物各止止畢志林壑中吾君如枯特

其二十

近代蘇雲卿漢時鄭子真遯迹意何如聊欲還
其淳千歲如流電萬事更故新伯夷本歸周黃

乙
小
少
一
本

公竟避秦古來英傑士終不墜風塵聖賢救世
心豈必夙夜勤卓哉柴桑翁百世朝暮親湯湯
洪流中惟子不迷津同好陸修靜晚負廬山中
安得酒如海喚起九原人

六月七日作聞許南仲遷謫

遠壑依依雲幕幕輕風拂拂雨紛紛窻前水石
含幽憤增我平生苦憶君

偶讀宋潛溪靜室詩次韻示兒子窩閑

生應祺二首

林扉面山開插籬村蹊隔室中靜圖書門前閒

杖屐雨餘暑氣清溪邊人事寂時時挾冊來汝
輩畱行迹

幽庭草積翠曲渚沙鋪明風驅酷暑去鳥呼殘
夢驚靜居何所修年光倏遞更少壯當勉業庶
以慰老情

退溪先生文集卷之一

退溪先生文集卷之二

三詩

十六日雨 辛亥正月

憶昨大雪當嚴冬北風怒號寒威兇鳥雀凍死
熊羆蟄冷室敗絮愁病翁今朝雨聲滿園林枕
上已作悲春心年光如馳人事改世故莽莽頭
雪侵東屯西崦屢遷居小草遠志終何如起來
大叫索酒卮看雲搔首仍躊躇

和老杜幽人

幽人在何許舉世誰同歸中林遠垢氛獨立靜

其儀蒞蘭以為佩松桂以為期苦心領道要超
然形迹遺應龍神變化貞玉絕瑕疵有時騎白
鸞游天略瑤池濯髮消盤水觀日扶桑枝歸來
寂無營霞飡薜荔衣我欲扣雲關問道探玄微
願無斬石髓精虔茹玉芝千年有餘樂一介寧
戀悲

十六日夜大風寒

元夕初昏月上天俄頃黑雲迷天邊三更霰雪
人不知曉來忽作雨聲懸蒼茫烟霧滿溪壑閉
門愁臥增寥廓后土泥融水活活蟄蟲欲動勾

萌作如何陰陽復抗滌大塊噫氣何旬旬山林
波濤衆竅號前逐千車後萬兵我構溪堂頗苦
辛直恐吹倒荒溪濱溪堂雖倒我無恨哀哉陳
死溝中人

十八日朝晴感興

幽人枕書臥燈影翳半壁不知厲風濟夢中餘
怵惕荒雞號霜月海色騰巖谷沈寥萬境靜昭
朗一室白興言整冠襟撫事增感激蒼蒼太虛
內湛然本無物或搏而雪下或怒而風作或蒸
雨繩懸或閉寒膠折其間好光景十日難一得

治亂互推遷善惡多反覆奈何治日少奈何善
入乏在天斯有時在人斯有責人能盡其責天
時庶調燮矧人秉帝衷日用多蠱賊清明僅一
瞬已被黃流汨卓哉古聖賢其言皦如日不知
者已矣知之胡不勗雋永牛山章病中恒三復

二十日又雨夜大風

陰晴若不常天怒人其安昨霽今復雨終日昏
林巒冥冥夜氣沈月黑雲迷關窗窅虛聞中風
作忽無端中宵撼地軸厥勢如崩湍叱吸戶牖
鳴掀簸巖谷殫莫測造物意顛顛誰敢干猛虎

噤不嘯巢鶴去無還唯有宋窓雞膠膠不廢官
寤歎不能寐擁膝土床寒誰哉力回天六合分
臬鸞

閒居次趙士敬具景瑞金舜舉權景受
諸人唱酬韻十四首

難隨時世學粧妍應物如方鑿枘圓往事已知
成大錯來緣何必問高天
填壑工夫好耐辛據城血戰豈關人若教不用
如山徑野火春風草又新

聖代崇儒正道開如何此事反驚猜若令曲學

圖阿世男子衣冠婦頰腮

少年前去路方長發憤功深未遽涼十九人前
何畏笑愧君先自剝剛腸

濂伊羣哲皆龍逝湖建諸賢亦鳳飛莫嘆流傳
資口耳後來作者偉同歸朱門末學流為口耳
之弊草廬諸公多以爲憂然歷考宋末元明之
際以朱學傳相授受卓然有得者多不可以流
弊爲本實病也

元虜中州溷幾春斯文猶得一番新可憐穢德
能如許不廢山林講道人三代以下國家待士

之道莫善於宋然小人得志者力戰天下之公
議指君子爲奸僞斥逐排擯使之不容於世唯
元朝却無此事使士不諱道學差可尚耳

陸禪朱辯障橫流天下幾成盡爲劉末學口中

騰性理草廬當日暗生愁見史

後生必欲令趨徑何異縫裳誤女穢不信朱門

還待陸沛然時雨望添雪小雨也○草廬患

口耳之失而欲反之甚善但朱先生此意不啻
拳拳從朱則本末兼舉而無偏從陸則欲徑而
歸於異學蓋草廬之見不能無病故如此云

文公平昔警門墻主敬研幾進室堂若事真經
與程註指南應不嘆亡羊 西山心經堊墩附註
備述文公尊德性為本兼修道問學之意且自
序之曰可謂指南之車云云

寂寞研窮向碧蘿吾東文獻費吟哦圃翁著述
嗟漫滅牧老文章幻說多 圃隱集一卷其所著
述宜不止此惜無從而得見之牧隱每自謂不
學佛然其稱述釋教不啻多且詳而於吾學殊孟
浪無的確說到處

陽村圖說儘為奇狀到天人合一時祇恐猶多

強牽綴恨無真眼訂吾詩 八學圖說說道理儘
細密但以心字狀天人合一之理巧則巧矣恐
未免杜撰牽合之病其畫卦自外始亦不可曉
佔畢師門百世名沿文泝道得鴻生成功未半
嗟蒙難喚起羣昏尚未醒 佔畢主於詩文而典
雅近道其門人沿流溯源如寒暄諸公大有奮
志七業未究而淫禍已及為斯文之厄久而愈
甚可勝嘆哉

武陵真愛竹溪名作屋渠渠訓後生道統推尊
雖已過人心昏寐豈無醒 周景遊肇創書院甚

盛舉但其意直推文成公爲真接道統之傳是
大不可

幽懷多少寄吟窻畢竟空言不入腔
襲置無令傳衆手人人未必便心降

有嘆

今世何人第一流
脊梁硬鐵擔千秋須知少味
還多味若道無愁轉有愁
謝透利關緣事洛胡
明物漬爲從涪自憐
半百無歸仰依舊人間寂
寂儔

清明溪上書堂二首
微寒棲移構小堂

於溪北次老杜韻

清溪環繞幾重烟
結屋溪邊僅若船
造次規模從容笑
幽偏形勢得吾緣
輕紅欲發花迎喜
嫩碧初生草帶憐
酒八口中纔盡若詩從筆下已
超然儒林道故難諧俗男子身多不直錢
恨未一生逢有道此心無路訂千年

心通一語道猶東
志異何殊聽借聾
利欲只今河決海
功名從古鳥過空
年年民俗困無告
箇箇人情嫌不同
有恨風光催嶺日
無言春色滿溪楓
病來稍減書癡絕
愁處難禁酒聖中
補過

希前垂至戒令人長憶紫陽翁

春日間居次老杜六絕句

昨日雲垂地今朝雨浥泥開林行野鹿編柳卻

園雞

不禁山花亂還憐徑草多可人期不至奈此綠

尊何

水聲含洞口雲氣帶山腰睡鶴沙中立驚廳樹

上跳

山田宜菽粟藥圃富苗根北約通南約新村接

舊村

樵人間出谷乳雀競棲簷小閣同何胤高臺異

宋纖

綠染千條柳紅燃萬朶花雄豪山雉性奢農野

人家

龔巖先生來臨溪堂

溪西茅屋憶前年溪北今年又卜遷第一光華

老仙伯年年臨到萬花邊

十一夜陪龔巖先生月下飲酒杏花下

用東坡韻

暮春欲暮前年春花開月缺愁殺人暮春未半

今年春月滿花樹風生巖臨流對酒高興發萬
斛閒愁如沃雪蘇仙一去幾今古依舊杯中一
片月唱徹瓊詞慢亭中仙風浩氣如憑空醉宿
江樓香滿懷夢魂不到東華紅

溪堂偶興十絕

四麓唯紅錦雙林是碧羅豈知淳朴處還被化
工誇

竹跨溪聲度堂依壑勢開從他笑深僻素履足
徘徊

開鏡為蓮沼披雲作石門和風吹澹蕩時雨發

綱緼

石竇疏泉遠山根卜宅幽客來愁絕險還往儘
悠悠

盡日雲含雨移時鳥喚春山村頗狎虎溪路少
逢人

已著游仙枕還開讀易窓千鍾非手搏六友是
心降

松竹梅菊蓮已為友

布穀催田務提壺勸客愁更憐雲外鶴無語立

松頭

爛熳堆紅紫清新遶綠青三杯偶獨酌萬事本

一本蓮下有
與字為下
有六字

無營

因病投閒客緣深絕俗居欲知真樂處白首抱
經書

掬泉注硯池閒坐寫新詩自適幽居趣何論知
不知

次趙監司李任上龔巖先生韻席上

別後唯憑雙鯉魚而今重拜地仙居綺筵開處
花相似瓊句留時錦不如三達久爲人所仰一
清何止史堪書却慙下客疎慵甚病覺腰圍日
減初

次李任密陽嶺南樓和朴昌世詩二十

二韻

乙未南遊嶺海秋曾攀危檻眺雄州紛綸世事
千回轉合杳天星兩匝周夢化浪尋三島月詩
疆空憶萬家侯病纏漳水寧天意詞賁滕王定
鬼謀舊說一琴隨隻鶴今聞長笛倚高樓風雲
八筆驅神變海岳披眸豁遠幽鄂渚烟光荆樹
外長沙秋色楚江頭霞觴艷海羞麟鳳仙樂轟
天詠瑟琴吊古自成歌激烈傷今尤覺語悲道
風斤妙質逢宜少白雪希音和豈稠山澤臞形

真自笑皇華佳什謬當酬携來夜屋虹光貫讀
罷晨窓瑞色浮熟路四方馳駿駕洪流千里送
飄舟烟花滿目啼黃鳥雲雨垂空舞翠虬達士
離塵清似蛻凡夫徇俗窘如囚觀風有愛畱棠
羨食力何尤付橘洲至教幾人承化雨浮名唯
我去懸疣凉凉獨見交如潦落落休論得若丘
荏苒光陰嗟易失回環倚伏弄難求悲傷觸事
嬰深抱感慨因公記壯遊安得樓居同吐納仍
看羽化脫喧啾浮游汗漫出六合臥閱蓬萊清
淺流

七月十三夜月

初秋夕霽天無雲月色萬里纖毫分天風湛湛
吹玉波銀河掩彩星韜文眼中忽失世湫隘坐
我瑤臺與瓊閣海山仙人如可招月裏姮娥相
唯諾彼美桂樹生蟾宮宜與天地無終窮婆婆
本不礙月明吳質妄欲饗天功我勸姮娥一杯
酒願乞玄霜玉杵曰凌風倏忽游八表萬丈紅
塵不回首赤壁見翅如車輪武夷臥聽金鷄晨
下笑顛狂李謫仙區區對影成三人

次金惇叙讀書有感韻

魯鈍無能只信書中間輕試利名途殘年始欲
追前軌末路依然作舊吾汲汲反躬須益友滔
滔立脚是真夫寸膠可救黃流濁參倚尋常在
座隅

次韻答新寧宰黃仲舉

夜枕強懷不滿張其如一念費稱量沂公尚戒
愚難免邵子猶思智善藏涉歷始知新得趣歸
來真覺舊迷方誰言簡策為糟粕此事應須問
紫陽

千林浩渺樹槎牙萬里同雲暮日車亂片非時

驚柳絮暗香無處覓梅花何知暈點朝回袖只
恐平封凍臥家坐想琴軒增絕致萬竿堆壓玉
相又

正月二日立春 壬子

窻外東風料峭寒窻前流水碧潺潺但知至樂
存書室不用高門送菜盤

黃卷中間對聖賢虛明一室坐超然梅窻又見
春消息莫向瑤琴嘆絕絃

上元日遇李庇遠於溪路同行卽事

春冰破玉水漫溪春日初暄野鳥啼馬上相逢

聯轡去晚風無數草生蹊

上元夜溪堂對月

溪翁獨向溪堂宿半夜開窗看月色金波潋灩
綠烟滅萬竅無風一室寂賞燈兒戲非吾俗占
歲氓情乃真感何如閱盡華山圖靜鑑惺惺讀
周易

次韻答李青松公幹二首

壽樂園亭傍渚磯銅章時到弄斑衣我今獨抱
無涯恨寸草三春失報暉
人曰山中不可居甌生塵土釜生魚起來謝客

無言說但覺窮愁昔已除

澗將拜龔巖於臨江寺其夜有雪先生
朝遣僧以一絕速之謹奉和先以呈上
天增絕致尋真境故作瓊瑤十里寒但得黃緣
攀雪子區區何必問袁安

暮歸馬上

春風吹水雪初晴候謁仙公野寺清去自欣然
來自得夕陽斜路馬蹄輕
李大成來訪溪堂

山花未發春強半溪鳥聞飛客又來淺酌高談

病一本作老

忘我病窮居苦節勉君才

清吟石

亂披紅罽裏間擔綠波回晚與溪童約盤擎活
玉來綠波酒名

答友人丁季晦時謫巨濟

死者長辭生亦分窮山藜藿瘴鄉雲百年契分
明霜義千里心懷爛貝文坐對鹿眠常戀友臥
看鶯跼尚思君從來佩服皆蘭臭莫為摧傷
必替芬

四月初一日溪上作

澡神古書在灌花清泉賴林居識鳥樂地坐看
蟻大夏初品物流春後餘芳馥雲生次寥間日
墮蒼茫外休休已無恨落落空多嘅唯有千載
人襟期與我會

答黃仲舉

愚者常為智所籠非非是是巧相蒙未知何事
為長策唯覺隨人最下風萬紫千紅微雨後白
雲青鶴故山中明時會見憐衰疾此樂何憂
未占終仲舉詩但恐鸞書驚鶴夢心親魚鳥
愛難終

幽居示李仁仲金慎仲

幽居一味閒無事人厭閒居我獨憐置酒東軒
如對聖得梅南國似逢仙巖泉滴硯雲生筆山
月侵牀露灑編病裏不妨時懶讀任從君笑腹
便便

溪堂前方塘微雨後作

小塘雨絲絲清晨獨來憇窻虛可坐臨地淨無
塵翳靄靄雲氣垂微微波紋細蒼苔濕滿嵌碧
草露委砌餘霏洗水面一鑑寒潑皆度鳥忽遺
影游魚新得計夙昔抱冲素生平不狎世蒙泉

有活源果育希晚歲題詩豈夢占觀書儻天契
何況後夜來風月更光霽

四月八日感事國俗以是日釋迦生稱
為節日

生賢生聖老天心本為斯人濟陸沈待得半千
猶苦罕自從中古更難甚么胡始降偏方蠶異
教終翻萬國淫最是無稽基福日誇傳作節到
如今福本作禍

次韻寄題黃仲舉新構竹閣夏赴都後
肉食終難近臭銅此君唯足友軒中竿竿立

非爭列籀籀龍騰欲上空瘦石寒溪團翠色疎
樞虛檻灑清風可憐入境俱新處續舊題詩愧
未工

八月十五夜西軒對月二首

遙夜夢家山起看梁上月更愛西軒中清光滿
疎檝

明月在天上幽人在窻下金波湛玉淵本來非
二者

次韻友人二首

班馬聯螯禁夔龍集鳳池菲才忝魯泮式穀愧

周詩

童頭退之嘆便腹孝先眠任逐桑榆煖何時此
計圓

次韻答林大樹四首 癸丑

閒思雀網門前設病畏儒冠座上我斂衽歸來
秋又晚菊花霜露一園多

門庭不掃蓬蒿沒几閣無塵書籍我獨坐深思
今古事異同今古本無多

逝水青年空恨忤高山前烈尚巍我好風深院
無餘事誰信遺經餉我多

心欣吉善如蘭馥氣湧姦兇似秦莠把衰齡
看古史衰齡看史轉傷多

題周景遊遊清涼山錄後

半世心腸未鐵剛仙山宿債久難償
夢魂時復凌清峭形役今猶墮軟香
白入匡廬吟日照韓登華岳撼天光
巨編何幸投來看千仞還疑共振裳

次韻黃仲舉 并序

仲舉曾求拙跡僕書晦庵廬山諸詩
寄去仲舉時得公山仙舟巖瀑布適

得廬山詩帖以為喜幸二絕見寄次

韻奉答

新發雲泉勝千尋想怒雷激牀來玩處嵐翠幾
重堆

夢想廬山河落水風塵三復紫陽詞聞君訪得
仙巖瀑相逐何時攬絕奇

題靈川子墨竹

舊竹飄蕭新竹長林間奇石狀奇章不知妙墨
傳湘韻唯覺風霜滿一堂

贈韓上舍士炯 甲寅

常愧吾行未透關指南欣得子相扳望中巖險
聊宜戒俗裏韜藏詎是尋功到及泉無棄井事
同攻玉藉他山會須默契環中意長占人間分
外閒

贈金生伯獻

紛紛餘事豈相關往軌知君力欲扳得謗更須
脩六蔽將身何忍作三孱畏途莫涉千層浪平
地終成九仞山好去雲林究爰象定應深契在
幽閒時二君將八山讀啓蒙

書徐處士花潭集後三首

末世天無改吾東聖欲居魯風猶可變箕訓詐
終虛前輩文華勝今人術業疎有誰能自奮躬
道向經書

嘆息花潭老子今未我踈抗身依聖哲觀物樂
鳶魚不藉彈冠手寧拋帶月鋤當年如得見勝
讀十年書

獨厲頰波泳聖涯林居如得鬼誰何數窺億世
猶看掌學沂千年欲擅冢似董替猶下帷讀如
會狂不倚門歌吾生又未斯人見自恐平生虛

擲過

窺一本作
窮

三月三日與李大用上舍同登寓舍後
岡李新自鄉來

雲物淒迷日隱空
客愁無處展忡忡
何辭五五三三去
只恐紛紛擾擾同
屋後平岡臨萬瓦
園中細草散孤筇
數杯輕碧逢君醉
歸意渾忘苦
向東

石江十詠為曹上舍雲伯作 駿龍

自讀石江詠憐君同我情
園從塵外卜家向水
邊成有趣孤棲樂無求
萬事輕王侯池館勝爭
比此間清

爽地山光裛虛亭
水色中拓窻分竹
日垂箔護蘋風漁
事隣家共農談野
老同人間豈無樂
此樂獨無終

絕壁千年地清江
萬古流雷連無故
迹寂寞有閒洲隱
士宜馴鶴漁翁自
伴鷗從君吾欲老
肯借一磯頭 麗王游幸處

富貴渾酣夢桑榆
或買園歡華舟夜
失悲恨草春繁絕
境無塵澹畸人斷
俗喧任他分得喪
高臥且加飡

家僮携杖慣春服
試身輕暖樹花爭
發晴洲草

滿生龍陽誇種橘甫里託蓋橙未識風雲樂真
成浪得名

借地真高義臨江見野居有時乘釣艇無事課
農書渚下蓬萊鳥潮通渤海魚茅山肥遜客況
復近幽廬有人借地築亭與聽松隱居相近
判不為今重居然與古違愛山晨獨往憐月夜
忘歸天籟自宮徵野禽無是非未須徵相法當
肉晚烹薇

山暝雲容合江空雨脚斜晚風吹桂楫春水沒
瓊沙西塞間飛鳥桃源杳泛花瓦甌蓬底酌隨

意不須賒

坐望遙空外行吟積水傍不辭勞杖屨常恐浥
衣裳家釀泉槽潔園蔬七筋香君看鷗浩蕩不
比燕巢梁

我作中年去無端命再霑似雲思返岫如燕
望開簾更被清詞發從知遠意添只緣謀病逸
非為嘆即潛

與李而盛韓士炯同登蠶頭因畱宿
凌晨出郭形神暢向晚登臺天宇明王國地
尊山有象海門雲遠水無聲不妨家釀千螺吸

暫借官奴一笛橫
鳥沒英雄今古地
何須扶醉問歸程

杏花效王梅溪次韓昌黎韻

漢陽賃屋園院空
年年雜樹開繁紅
墻頭小杏高出屋
春晚始替辛夷風
乃知王城地多寒物
候不與中州同攢枝
日萼香郁烈一一刻
剪舍元功我病三春不
出門杖屨時及閒園
中老眼猶知惜芳華
樂事難憑年少叢
樽前莫厭寂寥詠
猶勝楚客悲吟楓
明朝已約數同袍
風雨翻令四美窮
世間萬事苦難諧
西飛白日江流東

對花一笑花有語
嗟爾合作耕田翁

遇宋台叟於途期夕回
見過既至小酌

花下用東坡月下飲杏花下韻

偶然期賞芳園春
市橋南頭逢王人
歸來最憶龔巖仙
花片清宵詠採蘋
如今更覺清興發
桃花初動杏翻雪
一尊迎暮地勢高
霞色繞沈蕩籠月
人間萬事酒杯中
得喪毀譽俱成空
他年嶺海儻空詢
物外肯訪源花紅

紅桃花下寄金季珍二首

栽花病客十年回
樹老迎人盡意開
我欲問花

花不語悲歡萬事付春杯
晚雨廉纖鳥韻悲千花無語浪辭枝何人一笛
吹春怨苦草天涯無限思

答仲舉二首

昨夜松岡話竹軒朝來書到意欣欣遙憐節迫
風雷噫氣眼龍蛇百萬羣

騰蹕龍蛇氣勢豪任教蒼翠入雲高
清貧莫學湖州守千畝曾中似太饒

次韻趙松岡見寄十二首

南山終日望詩到想清塵宿昔遊仙洞尋常記

想本作
挹

病人倦閒從髮散愁醉尚眉顰長者無來轍關
門動涉旬

夏木風翻幕春華雨洗塵公為城隱客我作旅
停人迭唱諧金石傍觀錯笑顰却憐沈痼在渣
臥每連旬

俛仰成今古紛綸遣俗塵那堪為病客未始作
陳人賈誼明時哭陳搏隱處顰靜中看易理深
感贊雖旬

清朝容末士秦岳一微塵學劣常慙古交疎不
怨人衰成飯山瘦老作醋翁顰又發流年嘆春

歸忽已旬

清和好天氣庭院屏豈塵草靜看如我山高望
似人嗜書酣羨悅嘗世忍葱顰莫效湘纍賦浮
遊造宿旬

碌碌成何事徒悲鏡蝕塵但令神守宅無俾氣
撓人至道寧容攬閒愁不上顰何時隱仙嶽環
卦鍊循旬

風雨奄春盡芳菲落後塵青山空入夢白髮不
饒人鑄酒追餘賞烟霞慰淺顰因思花裏醉惆
悵只前旬

荏苒無留景徘徊尚在塵莫嫌春後境猶對意
中人葉裏陶餘憾罇前鄙不顰明春遊此地定
約幾番旬

經濟無籌策謳吟只蠹塵伐檀慙厚祿移谷嘆
愚人覘眈愁邊轉濃蛾夢裏顰鄉程時默數跋
涉僅周旬

達士觀中夏毫端集一塵無拘真樂事有累卽
凡人衆綠迤時吹同雲帶晚顰病中存攝理不
必待休旬

朱紱儻來事清標非世塵興酣柯爛客情屬下

簾人攄素那禁寫憂饑獨自顰為公吟徧側顏
色阻盈旬

盡日憑烏几薰風遠市塵眼中忻節物林下憶
高人法豈維摩喜慵因褊襪蠶最難堪熱濕長
夏柰纜旬

次韻松岡

求田問舍肯嫌遲賃屋聊從棘作籬每歎昌黎
志能復深懲司馬坐成馳堆庭赤葉仍無事滿
眼黃花亦一時衰暮未成真箇業病中排悶強
裁詩

寓舍西軒早起卽事

夜枕浪浪徹雨聲朝霞明滅弄陰晴無氈坐上
仍無客有籜園中亦有英宿鳥自營飛散早家
僮雖懶掃涓清讀書契意忘安飽相勵何人共
日征

病中有客談關東山水慨然遠想復和前韻

賃屋深坊遠市聲端居秋末愛新晴風前挺挺
衫翹幹霜下鮮鮮菊秀英散地身閒如不病凶
年家空似真清邇來夢想仙遊地何日投簪獨

遠征

宋台隻雪中見訪

雪裏來敲羅雀門一尊清座笑相溫
耽看玉海翻空勢不覺銀城帶暮痕

周同知景遊挽詞

自是東南美所鍾文如山斗氣豪雄早登臺閣
名聲籍中典州城頌詠颯三入成均垂睿想
一分陝右動民風銀臺草教能宣旨玉署
陳圖最見忠闕佛封章士爭誦尊賢祠字世初
崇茲言間出如傾漢傑句時傳似搏龍進進誠

心在君父沈沈身疾感蛇弓人間斷斷唯應我
地下修文定是公千日哀榮恩典下一生事業汗
青中竹溪遶舍流千載誰識先生意不窮

送韓士炯往天磨山讀書兼寄南時甫

五首

風烟都掃舊繁華尺五天磨翠不磨滿載遺經
相逐入三冬奚啻得三多

石劔天紳掛海東人言奇勝競爐峯此身尚墮
醯雞甕何日雄觀一盪會

憂患從來玉汝身動心忍性境還新不須更向

玄玄覓精義尋常有入神
時甫重遭患難後養疾于此山

扶病來京歲屢除此行真箇愧心初細思未必非天幸多見平生未見書

舊聞宗聖戒淵冰今悟程門印去矜歲暮王城深巷裏掩關孤坐若無憑

台叟來訪云夢中得句相思成鬱結幽恨寄瑤琴覺而足成四韻書以示之次

韻

踏雪來相訪題詩笑復吟夢中神感激書裏意

沈淫得失難齊指艱虞更勵心何妨無世用願作沒絃琴

得金厚之寄詩次韻却寄乙卯

東觀雲蹤散幾年相思千里每依然只今世事勞人甚羨子行遲更覺仙厚之患脚痺因以為戲

病慵

我素抱病長坎坎民今思食政喁喁訂頑不柰憐同體尊性還須警已慵

題金季珍所藏蔡居敬墨梅二首

古梅香動玉盈盈隔樹冰輪轉上明更待微雲
渾去盡孤山終夜不勝清
瓊枝疎瘦雪英寒縱被緇塵不改顏可惜詩翁
真跌宕在將調戲比端端

東湖留別閔景說參議二首 仲春將歸
嶺南

二月東湖風雪天感君追送意拳拳因思丙午
湖船別候忽如今已十年
往事追思已惘然別詩猶記五三篇如今別語
尤堪荷歸管烟霞五百年 景說謂余此歸當與

尊巖老仙齋壽故云

金佐郎顯卿自湖堂攜酒來夜話

東觀仙遊記昔年一生辛苦坐沈綿東行又被
詩仙款手校雲編夜不眠

舟行示宏姪高兒三首

春陰漠漠水悠悠去 國孤臣一葉舟好待晚
天晴日景水禽多處玩芳洲

虛輿倉江上

春水船頭綠潑油晚來貪看戲羣鷗不知萬類
中何物更有閒情與汝儔

黃江舟中喜晴

今日天晴暖始生歸舟搖蕩白鷗輕何須更待
桃花浪綠漲仙源正好行

寓龍壽寺龔巖先生寄示蟠桃壇唱酬

絕句奉和呈上二首

襖結蟠桃子于今第幾年花前看一局浮世日
過千

小臣辭病日大老樂閒年未到桃源界塵愁已
洗千

初歸陪家兄與諸人會清吟石

躑躅春猶闕邯鄲夢始回清吟無盡載從此百
千來

知中樞龔巖李先生挽詞二首

逸樂 三朝貴聰明大耋年都門追漢傅香社

紹唐賢世自多翻覆身誠享具全誰知愛 國

淚臨化尚漣漣

寵眷 三朝厚風流一代尊浮名同草芥勝事

極林園幾幸籃輿舉俄驚鶴夢驚羊曇無限慟

不恐過西門

答季珍

力耕多餒笑農憨榮落終誇樂有三脚下豈應
無實地人間誰定是真男秋回澗樹生涼籟雨
過山堂滴翠嵐獨坐吟詩無與聽悠然回首憶
終南

宋企村純俛仰亭二首公居在潭陽時

為善山將辭歸寄書索題

七曲高低控二川翠鬟無數迴排前縈簷日月
徘徊過匝域瀛壺縹緲連村老夢徵虛宿昔使
君資築償風烟傍人欲識亭中樂光霽應須別
有傳

手本自註
夢徵資築
皆亭之實
迹

松竹蕭摻出徑幽一亭臨望岫千頭畫圖隱映
川原曠莽蒼依佈樹木稠夢裏關心遷謫日吟
邊思樂撫摩秋何時俛仰真隨意洗却從來局
促愁

琴間遠東溪惺惺齋二首

東溪深闢小齋新苔徑柴門迴絕塵為問主人
何事業寸膠功力自珍身
河南門下謝先生百聖心傳一語明妙用深源
都在熟瑞巖穉裨不須評

次韻黃新寧仲舉

君詩如共我神謀蕭灑清真儘有由嚮道讀書
新得契虛心看竹屢經秋雲山石室須紬匱世
路風波莫棹舟老病自嗟精力退如君何待隱
居求

十月四日遊月瀾庵二首

一葉扁舟度碧流來尋叢桂小山幽寺門白日
臨哀壑臺石蒼松戴凜秋掃迹免同逋客返傷
心無復老仙遊箇中趣味無人共清夜寒燈意
轉悠蕞巖屢遊此

莫道林林我最靈靈源才泅等昏冥雖當老境

兼衰齒只在真知與力行伯子後時懲獵習文
公早歲驗鐘聲君看動靜相循理隨處隨時豈
暫停

十一月入清涼山

休官處里閤養疾頗相梗仙山不在遠引脰勞
耿耿夜宿孤山庵晨去越二嶺俯看積曾冰仰
視攢疊穎跨木度奔川凌兢多所警深林太古
雪白日無纖影側徑滑以跼其下如坑窅行行
力已竭上上心愈猛山僧笑且勞延我西寮靜
安神八九日閉戶藏頭頸不見滕六怒焉知屏

翳暹今朝愛日妍策杖巖路永陟彼挿天嶺宇
宙雙眼騁衰筋畏峻極此願未遽幸躋攀猶少
試顧眄雲千頃妙意祇難言佳處每獨領歲律
行欲窮不恨身幽屏懷哉平生友使我心怲怲
珍諾未成踐遐蹤又難請安得此同來努力造
絕境

遊山書事十一首 用雲谷雜詠韻

登山

尋幽越澹壑歷險穿重嶺無論足力煩且喜心
期求此山如高人獨立懷介耿

值風

今日大塊噫簸撼百圍木聲雄萬馬驅勢劇九
溟覆笑我爲病軀牢關自縮慙

翫月

千巖雪嵯峨月出愈清肅幽人坐不寐寒鏡低
梵屋夜久香寂寂真成媚幽獨

謝客適有此事

山人亦款入酒食要餉夕我云子休矣後者情
難極山人笑而去日墮遠山黑

勞農同上

山農住山城沃土耕非緩如何捨此去町疇荆
棘滿欲及畏里胥非關生理短

講道

聖賢有緒言微妙非玄冥源流有所自毫末有
所爭講之欲何為志道求其寧

懷人

孤蹤在世間常恨少朋遊有如鶴鳴陰和者何
悠悠空山歲暮時獨詠無相猶

倦遊松岡欲擬我按江原令遊金剛山
余鮮之

故人欲薦我勸我遊丹丘此意固已厚此事寧
非愁焉有受方面為謀方外遊

修書

我讀啓蒙書一管窺玄關傳疑自備忘不托麻
衣女媧靜中聊一修得處非世間

宴坐

朝市竟何禪山林久無厭身羸好燕養質愚須
學破禪窓白日靜不用珠數念

下山

移樓萬仞崖其下臨無底抱病畏處險頗好寄

度齒俯然下山去雲林香幾里

還家

遊山何所得如農自有秋歸來舊書室靜對香烟浮猶堪作山人幸無塵世憂

往在乙亥春叔父松齋遊山寓上清涼庵混與諸兄弟侍今來不勝感涕示諸

姪孫二首

清涼寺裏憶陪遊卅角如今雪滿頭鶴背幾看陵谷變遺詩三復涕橫流
重尋唯覺我為人流水桃花幾度春汝輩他年

一本松齋下有先生二字

知我感當時同汝少年身

次黃仲舉元日韻丙辰

拙朴由來得自天追尋芳躅每欣然聰明此日非前日習氣今年似去年透得利關聞上蔡驗來學力說伊川吾儕更勉躬行處莫向人前枉執鞭

與仲舉論圖書二首

京國三年笑絕癡病中辛苦學希夷可憐所得如窺管林下猶堪樂 聖時
邵傳羲易絕人知香瓣雲臺百世師可惜梅巖

親指後終身不悟啓蒙微

寄李而盛之蕃時以司評棄官來隱于

島潭

我會為吏隱丹丘幾挾飛仙夢裏遊聞說島潭
今有主想應多我舊風流

立秋日溪堂書事三首

宿霧初收曉日鮮寒溪幽壑共蒼然病中軀體
纔溫攝窮裏田園半廢捐滿壁圖書常獨樂一
庭烟草為誰憐秋來又約同襟子明月清風上
釣船

霽澤蘇枯綠滿疇石溪清漲碎琳瑯火雲赫日
渾如昨清樾寒蟬颯已秋種菊盈庭存晚計觀
魚在沼得天游 聖朝微物如蟣蝨鵠罷深祈
協所求

小屋欹斜風雨餘石牀蒲席自清虛書生有約
來山寺田父無求近野廬養疾偶成三徑趣愛
閒并罷一竿漁何因得向瑤琴裏聽取希音遂
古初

澆近再蒙 召命一以僉知一以副提
因病甚再上辭狀仍乞致仕有 旨濂

玉堂又有安心在閒之 旨不勝感激
之至然不 許辭樞府不 報致仕之

請再用前韻三首

積雨新晴物色鮮清風幽澗政冷然羣公見愛
宜深責 聖主包荒不頓捐天上神仙非骨法
眼中丘壑自心憐何能身世渾無累萬頃浴泗
不繫船

凡夫自合老田疇瓦釜難堪廁憂瓊馬倦欲辭
天甌日魚游將轉海波秋 綸言枉作山巖賁
福性猶諧水石遊感激 至思無以報直將心

事古人求

圖名誰肯食吾餘乞丐微誠竟墮虛納祿要明
臣子義為官寧在野人廬深蒙物議歸逋慢曲
被 君恩與釣漁古道卽今雖未遂且欣心事
入閒初

次韻金應順秀才

永慨難追古多慙未副名君來真自誤我勸亦
徒誠百練絲能白千磨鏡始明老夫猶有意年
少肯虛生

贈別應順

味道龍鍾我可吁君今年少莫功踈來窮家數
雖臻妙去八宮牆恐落虛千聖源流閩洛學六
經堦級魯鄒書由來此事難容躡萬里行從一
步初

奉酬南時甫見寄

與君不相見時序去堂堂綿延各抱病寂寞兩
韜光所希在往躅所服會迷方解牛有餘地樞
苗斯自傷相思欲相勵關嶺阻風霜緘辭寄歸
鴈悵望西雲蒼

秋懷十一首讀王梅溪和韓詩有感仍

用其韻

吾衰學老圃種瓜瓜薺薺瓜成一再摘摘勢殊
未已秋風動園林蟋蟀鳴惻耳瓜畦有宿萎瓜
蔓無新起萬物天壤間其變盡相似天道自有
常人情已難恃感物隱幽衷撫迹追前軌浮榮
儻來去何足為悲喜

庭前兩株梅秋葉多先悴谷中彼薈蔚亂雜如
爭地孤標未易保眾植增所恣風霜一搖落貞
脆疑無異芬芳自有時豈必人知貴

秋山景色好朝霽雲曼曼身上一布衣盤中一

稜層一本

簞飯逍遙絕外事
俛仰適素願如何故人書使
我發浩歎是非久乃一情偽
初相萬有技覆國
售有實哉身獻人苟味大道
天公未可怨

白雲不可贈青雲
不須凌富貴等浮烟
名譽如
飛蠅安能強衰疾
終日受嫌憎
秋澗下清泚
寒崖露稜層
猿來窺果園
兒去看魚層
萬戶人所
要一壑吾猶能

悽悽抱秋懷
懷懷追古警
有恨不可窮
有嘆亦
已永辨惑誠
不易媚技胡
乃猛針心
無寸鐵斷
幹有極綆
晨坐讀宋史
當時真不幸
已矣可奈

何牀頭書且屏

秋霖開久鬱喜見
曬晴景忽復雲埋
空書室黯
虛罔悄然無與語
心事何多梗
安得豁天宇
登
高遐眼騁溪山
多勝處意行不待請

山日隱雲暮
溪邊路稍暗
屐響鳥不驚
衣露我
無憾環堵誠蕭條
且免鬼窺瞰
以士托農圃
分
甘羸與淡君子貧而樂
小人窮則濫
宮牆窺豈
髣日月至未暫
治病艾猶蓄
涉世舟初纜
蕩蕩
已無疑紛紛何足
勘里社共勞勉
新穀見盈甌
昔游蓬萊觀古道
追羲軒圖書萬軸
藏日月雙

輪奔多病負 國恩事業安足言同游衆才彥
斂衽皆盧前退歸非好事誠恐刺素餐猶堪夙
志諧林下事塵編心悅味芻豢力愧功百千涼
飈撼庭樹肝膽自生酸玄晏一生痾孝先晝日
眠但願遂此意泉石送餘年

我硯磨不出龍蟠泓海乾我腹詩書空欲呈非
琅玕獨來巖下居松桂愛團團 天恩未敢承
怵惕久靡安伐檀冥河干河水清且瀾祇爲食
其力誰信甌臾九嶺路阻且長躑躅停秋鞍
曉枕不成寐空階秋雨聲悲蟲禱四壁攬耳到

天明因時感物變撫事省已誠世運迭隆替天
道更虛盈邯鄲故酣夢蠻觸幾爭兵惟知金石
堅不願錦繡榮回車及未遠幸矣天所令

美人隔天涯宿昔同所好相思不能忘爾來胡
不早我有一畝園松菊幽貞保亦有梅與竹並
我形癯槁悵望無與晤誰哉肯此道

次韻權生好文

適洛人皆走越如應緣澆薄喪真餘吾心正似
天開鏡古學還同日照書博約淵源寧有雜明
誠宗旨不容疎可憐才力能馳騁只恐當前本

領虛

答權生應仁二首

白首心猶壯青雲氣始降為農仍在礪結社改
臨江逢觀謝金櫃玉堂違霧憲何須高隱事更
擬鹿門龐

汨汨悲流俗滔滔混逝川眼中生險地頭上有
高天事忌爭雄長詩難突過前古來懷至寶不
必在誇傳應仁言及華使唱酬事

黃仲舉求題畫十幅丁巳

陋巷筆瓢

末二句一本
作唯應會心
處和穎也罷
傳

陋巷端居獨闇然輝光烈烈照窮天當時不有
鑽堅力至教誰明萬世傳

舞雩風詠

童冠春游亦偶然何能感聖極稱賢若知箇裏
真消息蓋世功名一點烟

桐江垂釣

故人相見動星辰歸釣桐江自在身致世少康
渠已辦不須要我試經綸

粟里歸耕

卯金竊鼎勢滔天擷菊江城有此賢餓死首陽

無乃隘南山佳氣更超然

濂溪愛蓮

牡丹傾世菊鳴賢千載無人解賞蓮感發特深
無極老花中君子出天然

孤山詠梅

一棹湖遊鶴報還清真梅月稱盤桓始知魏隱
非真隱賭得幽居帝畫看

洛社獨樂

五畝荒園四海春澆花剖竹摠經綸可知此樂
能兼濟終轉乾坤樂及民

武夷九曲

憫世難從聖海浮隱屏嘉遯且優游晨門豈識
當時意只有寒溪萬古流

孔明草廬

龍德深藏自養珍茅茨不剪僅容身誰知一奮
天旋轉噓起炎光四十春

康節兒車

至人生遇太平天宇宙兒車樂事全莫道無心
經一世清風千古是人傳

遊太子山盤石

數層瑩淨石成窪寒水粼粼澗波綠樹兩邊
遮白日幽香時度隔溪花

遊孤山

十年重到訪孤山綠水蒼崖照眼寒惆悵主人
何處去空餘基築白雲間李上舍庇遠卜居遺
址宛然

書孤山石壁

日洞主人琴氏子隔水呼問今在否耕夫揮手
語不聞悵望雲山獨坐久琴間遠

尋改卜書堂地得於陶山之南有感而

作二首

風雨溪堂不庇牀卜遷求勝徧林岡那知百歲
藏修地只在平生採釣傍花笑向人情不淺鳥
鳴求友意徧長誓移三徑來棲息樂處何人共
龔芳

陶丘南畔白雲深一道蒙泉出良岑晚日彩禽
浮水渚春風瑤草滿巖林自生感慨幽棲處真
漚盤桓暮境心萬化窮探吾豈敢願將編簡誦
遺音

再行視陶山南洞有作示南景祥琴堦

之閔生應祺兒子寓孫兒安道

卜居退溪上年光幾流邁寒棲屢遷地草草旋
傾壞雖憐泉石幽形勢終嫌隘喟焉將改求行
盡高深界溪南有陶山近祕良亦恠昨日偶獨
搜今朝要共屆連峯陟雲背斷麓臨江介綠水
遶重洲遙岑列千巒窺尋下一洞宿願茲償債
窈窕兩山間晴嵐如入畫衆綠靄霧霏紛紅絢
罽曬鳥鳴思雅詩泉靜玩蒙卦躊躇足佳賞辨
此感大塊我今置散逸朝衣久已掛藏修詎無
所地薄輕買賣荒榛有頽址古迹爲今戒何人

會占此漫滅譽與責亟謀營環堵窻戶看蕭灑
圖書溢庑架花竹映榭砦日月警遲暮身心勉
疲憊中誠墜三益外慕忘一芥此樂如堦麓夫
仁匪梯裨爲君歌弗告無令虧一蕘責音債諸
也見韻會

馮家飲歸詠溪月二首

帶醉歸來信馬行一鉤新月照溪明縈回屢渡
溪中月溪月相隨曲曲清
踏月歸時霜滿天衣巾餘馥菊花筵箇中別有
醒心處水樂鏘鏘太古絃

琴上舍夾之清涼山韻

仙嶽今年子獨尋我閒芒屨病凌侵空吟美句
霞翻眼尚想高臺月滿襟抗志不將雲作贈讀
書唯擬鶴知音丁寧好在匡山勝頭白須昇最
上岑

秋日登臺

出世能無友善才索居恒恐壯心顏青山嶷嶷
終難狎白髮森森漸不猜樂事只應尋處得愁
腸那復念時回天開絕勝滄浪境風月襟懷付
釣臺

歲終琴聞遠琴塹之金子厚將歸示詩

相勉亦以自警警安道三首

翰墨爭名已喪真那堪舉業又依人可憐往日
如奔駟來歲工夫盍日新
科目焉能累得人學通諸理可兼伸如何滿世
英才美一落終身未轉身
生爲男子不訾身此事何須讓別人齷齪無成
應坐懦從今努力競時辰

成上舍運隱居俗離山下黃仲舉就訪
有詩見寄次韻戊午○余少時望見此

人於試場中尚憶其標致

昔日專場秀如今遯世翁終南非捷徑谷口信
遺風岸潤龍藏裏山輝玉韞中誦君相和句高
興激人曾

李秀才叔獻見訪溪上

從來此學世驚疑射利窮經道益離感子獨能
深致意令人聞語發新知

滄浪詠懷

風埃顛倒幾逡巡尚喜林泉見在身若水不應
忘聖主義之何必誓專人屏山宴坐看飛雨洛

水間臨玩躍鱗二樂安能知妙趣眼前光景只
今新

和趙上舍士敬五首

漁父滄浪喻濁清陶公歸去願藏聲非才食力
何須問只自端居愧 聖明

千頃黃陂豈濁清由來形大自宏聲我無美質
兼深學空覺前言皦日明

瀕洞奔流不解清簷聲晝夜亂渠聲何因上挾
浮雲嶺六合褰開輾大明

八表同昏誰與清蠅蚊圭篲獻雷聲小齋賴有

醒心處綠竹紅葵映案明

誰分重濁與輕清此理何曾有臭聲欲識義文
千古意雲臺真箇牖人明嘗與士敬論啓蒙

答李仁仲

何時洞壑積陰清可試尋山屐齒聲默坐虛堂
看變化才明還晦晦難明

甚雨有感次李大用韻大成所和

去年夏旱秋大熟穀斛贏三匹布換故知渴澤
禾乃盛倍見天功人事半今年夏潦跨秋月長
似黃河百川灌直恐天瓢瀉不停無乃月畢離

無筭后土瘡痍田卒萊農夫輟手相吁嘆皆言
水災甚旱災靡子非徒若雲漢日復日兮夜復
夜但見四野洪流漫明裡百祀在黍稷闕賦將
何供執爨怒潰波濤陵谷變驚改窟穴魚龍竄
近聞航稻獨峻茂地痺嘉成亦難判山翁未測
天人理易範誰能管窺玩曰暘之咎應有由龍
戰之傷坐不斷白來天戒本昭昭大號何難施
渙汗蠶陰薄正陽復微古聖丁寧慮治亂可令
陽勝莫陰勝此理正待伊周贊一身羸癯百疾
纏閉門飢臥愁眉攢去聲見謂會調息尤難值

愆候防微過盛理一貫兩君吟嘆類堯篋欲和
思乾屢搗腕離鑄肝腎聊自強寄處何妨發一
祭

七月既望久雨新晴登紫霞峯作二首
野曠天高積雨晴碧山環帶翠濤聲故知山水
無涯興莫使無端世界櫻

綠野新秋色滄江乍霽天高峯霞外迴蕭寺壁
中懸歷歷汾川樹依依牧谷烟偶來成獨樂莫
遣俗人傳

九月如京廿五日始出險抵惟新

一路迢迢接玉京多山多水儘難行他鄉到處
厭機巧逆客逢時知物情霜氣曉侵喬嶽冷鴈
行遙帶片雲橫向來丘壑風流事回首無言倚
驛亭時自京來者皆傳說物論

冒雨入用安驛

山巖情性鹿麋同自分年來天放翁白髮紅塵
會不意畏途羸馬若爲衰烟波舊伴愁孤釣松
竹新居望畢功撥雨衝泥投野館歸雲落照思
無窮

初入城松岡餉松酒以二絕次韻謝

松酒之酒
一本作醞

鹿走山林歲月深魚窮不解嘆蹄涔豈知今夜
思鄉夢驚破晨鐘長樂音

我匪麤豪索酒即忽擎松酒滿瓶香歲寒風味
松岡韻一舉何辭累十觴

寄南時甫

急雨顛風撼夜牀遽然驚破夢還鄉平生不恨
儒冠誤末路深知世事妨漠漠橋山成久別蒼
蒼蕭寺定何藏嗟君欲識余心事請誦衡門第
一章時甫為獻陵參奉欲讀書於山寺

趙松岡挽章

望斷高標慘士林松岡蕭瑟月空臨黔妻不願
餘斜被震客會慚却餽金天上豈容辭作記人
間難復遇知音白頭握手仍成訣長憶平生淚
滿襟

次韻鄭靜而所和朴和叔二絕

隱君城市圖書靜靜而才子江湖歸夢長和叔
我自江湖到城市一身長伴病吟牀
不是羽金輕作重寧能鳧鶴短為長
頭臥病
長安雪慙愧當年讀易牀

寄月川趙上舍士敬

一第平生幾誤身，素衣今復化緇塵。
盤旋客莫恨年來到骨貧。

舟中示南時甫已未。春東歸時甫追
及於大灘同舟而行。

曉靄濃仍晚，春山遠欲無。
江湖生錦浪，林野著屏圖。
物理何曾隱，人情自未符。
歸舟深載病，白日照襟孤。

三月三日

三月三日驪江上桃李半落梨花開
蓬萊五

雲屢回首浩蕩烟波歸興作

可與江上別南時甫

此後重逢知幾秋，舟中今日別離愁。
還將白髮三千丈，去八仙源獨泝流。

曉發北倉江入峽寄時甫

曉日蒼涼積水空，緣崖躑躅爛蒸紅。
扣門漁棹桃源入，難與仙舟巾角同。
關塞極天沾句北，家山迎眼我歸東。
定知此後長相憶，努力無虧一篋功。

退溪先生文集卷之二

